



पुर्खा दय्क तकगु सम्पत्ति, भीगु कला व संस्कृति
पिकाक-भक्तपुर नगरपालिका



नेपाल संवत् १९४१ पोहेलाश्वः/२०७७ माघ १/२०२१ Jan./ ल्याः २७, दौः३



**ख्वप नगरपालिकाया
व्याकगु नगरसभा उलेज्या**

वागीश्वरी मा.वि. या न्हूँगु भवन शिलान्यास

(२०७७ पुष १३ गते)



संस्थागत ब्वनयकुथिया प्रिन्सिपलजु पुं नपां ब्वनयकुथि

चाय्के हाँ जुगु बैठक

(२०७७ मंसिर २९ गते)



; DkfbSlo

@)&& df3 !, c^a\$ %#, jif@

सांस्कृतिक क्षेत्र घोषणा सकारात्मक पला

कला व संस्कृति, सम्पदा देया अमूल्य सम्पति खः । थुक्रियाता म्वाकः तय्गु भी फुक्कसिया साभा कर्तब्य नं खः । स्वनिगः सम्पदाया भण्डार हे खः । उकि मध्ये प्राचीनता कःघाड थःगु मौलिक पहलं थःगु कला, संस्कृति सम्पदा ल्यंकः म्वाकः तय्गुलि खप दे विश्वय् नां दांगु सहर खः । खप दे याता थःगु मौलिक पहलं छायेपियो छगू तस्कं बांलागु सुन्दर नगर दय्केगु खप नगरपालिकाया म्हागस खः । का. रोहित जुं चवयो द्युगु (१०० वर्ष पछिको भक्तपुर) सच्छीदा लिपाया खप दे याता मार्ग निर्देश काथं कायो, वहे ढंगं थःगु पहिचान क्यं क्यं वयो चवंगु खप नगरपालिकाया डाकगु नगर सभां कला, संस्कृति व सम्पदा म्वाकः ल्यंक तय्गु मतिं कला, संस्कृति व सम्पदा संरक्षण याय्ता दयकगु ऐन २०७६ पारित याड अझ ब्यवस्थित याय्गु कुतः यागु खः । खप दे पुलांगु थःगु मौलिक पहलं ल्यंकः मूर्त व अमूर्त सम्पदाता म्वाकः हज्याड चवंगु नगर खः । नगरया पुलांगु थाय्-बाय्ता स्थानीय सरकार सञ्चालन ऐन २०७४ या दफा ९ (३) काथं सांस्कृतिक क्षेत्र घोषणा याडः उगु क्षेत्रदुनय् स्थानीय नागरिक बाहेकं मेपिसं छँ बँ न्याय, मिय मरुगु ब्यवस्था यागु खः । उगु निर्णय सार्वजनिक जूसेलिं मेमेगु अपलं नगरपालिका तय्सं लसकुस यासे खप नगरपालिकापाखं जिमिसं नं सय्के सिइके माला धायो नगरपालिकाय् वयो सल्लाहत कायो चवंगु खः ।

खप नगरपालिकाया मू उद्देश्य खप नगरता पुलांगु शैलीं भीगु थःगु मौलिक पहलं छायेपियो हलिमय नां जःगु थी थी सम्पदात धःस्वाक तयो थःगु म्हासिइका पिब्वयो चवनय्गु खः । गुकिं 'पुर्खा दयक तकगु सम्पति, भीगु कला व संस्कृति' या नारा सार्थक जुई ।

खप नगरदुनय् द्रहं वय्गु च्यागू धवाका (लाँपु) दः । उगु च्यागू धवाका दुनय्या देगः, फल्चा, ल्वहँहि, तुंथि, मथ, थजगु सम्पदात सकलसिया साभा सम्पति खः । उगु साभा सम्पति ल्यंकतय्गु नं सकलसिया साभा कर्तब्य नं खः । खप नगरपालिकां हलिमय नां दांगु विश्व सम्पदाया धलःखय् नां जायो चवंगु डातापोल्हे देगः, भैलदेगः वत्सला देगः नपां तः भवखाचां स्यंकब्युगु सच्छी मयाक सम्पदात ल्हवनय् धुंकगु दः । गुकी विदेशी तय्गु ध्याछ धेबा हे मकसिं जनताया धेबा व ग्वाहालीं हे ल्हवनय्-कानय् यागु खः । दकलय् चवछाय् बहुगु खाँ छु लय् धःसा नगरपालिकाया इनापय् सम्पदा ल्हवनय्गु इवलय् स्थानीय जनतां थःगु सम्पति भःपियो यागु जनश्रमदान, थी थी जिन्सी सामग्रीत बियो यागु ग्वाहाली व फछिंफक्व दाता तय्सं यागु आर्थिक ग्वाहाली खः । उपभोक्ता समिति निस्वाड नगरपालिकां थःगु धाय्गु भावना ब्वलांकः याड चवंगु समपदा संरक्षण व सम्बर्द्धनं थःगु मौलिकता म्वाकः थःगु म्हासिइका पिब्वयो चवंगु दः ।

नगरपालिकां थः यत्थे सांस्कृतिक क्षेत्र घोषणा यागु धःसा मखु । नेपः या संविधानया मर्म व स्थानीय तहता ब्युगु अधिकार्य् दुनय् चवड हे ऐन दयकः थुगु ज्या हछ्याड चवंगु खः । निश्चित क्षेत्रता सांस्कृतिक क्षेत्र घोषणा याय दैगु काथं खप नगरय् चवंगु च्यागु धवाकाया दुनय चवंगु क्षेत्रता जक सांस्कृतिक क्षेत्र घोषणा याडः उगु थासय् मौलिक पहलं दांगु छँया मोहडाय् खर्च जूगु सिँ, अपा या ३५ प्रतिशत धेबा नगरपालिकां अनुदान बियो वयो चवंगु दः ।

अः वयो ब्यक्तिगत स्वार्थ हछ्याड जूपुं सम्पदाया महत्व हे मथुपुं नेम्हा पेम्हा सम्पदा विरोधी मनुतय्सं थुगु ज्याया बिरुद्धय सर्वोच्च अदालतय् मुद्दा दर्ता याता । उगु मुद्दां नगरपालिका बिरुद्ध अन्तरिम आदेश जारी याड उगु ऐन कार्यान्वयन मयायता निर्देशन ब्युगु जानकारी वगु दः ।

२०४५ सालया भक्तपुर काण्डया मतियार, खपय बदनाम जुयो खपय फुक्क सम्पति मियो उठिबास जुयो वांम्हा समपदा विरोधी मनुनं पूर्वाग्रही ढंगं यागु मुद्दा धाय्गु खाँ थुइकः देया भाषा, कला, संस्कृति व सम्पदा संरक्षण याड थःगु देया इज्जत व गौरव चवजाइगु काथं दयकगु उगु ऐनया मर्म थुइकः न्यायालय सकारात्मक जुइगुलि सकल खपया जनता नपां खप नगरपालिका आशावादी जुयो चवंगु दः । भलोसाकाय् न्यायालय सकारात्मक हे जुई ।

पिकाक-खप नगरपालिका/सम्पादक-आशाकुमार चिकंभञ्जार, डेस्कटप-धन लक्ष्मी त्यात, आवरण सज्जा-रेणु ध्वज्, थाकू- भक्तपुर अफसेट प्रिन्टर्स फोन ल्याः ०१-६६९३०४३, ई-मेल- khwopapau@gmail.com



इयस्वंगु स्वप पौ. बःछि पौ(पाक्षिक)

विश्वक्रान्तिया दीर्घकालीन उद्देश्य समाजवाद हे खः

● का.रोहित

राजनीतिक ब्यक्तिगत फाइदाया लागिं मखु देश व समाजया सेवाया निंतिं जुयमः । राजनीतिक बेइमानी, पदीय ल्वापु अपराधी मनुत मुड पार्टी तःहानय वं हे सिद्धान्त व विचः लं प्याकय् मफूसा व मनूया भीड वा अपराधीतयता संरक्षण विडगु जमातजक जुई । व नेपाल मजदुर किसान पार्टी निस्वांगु इलय् निसैं कार्यकर्तापिन्ता मार्क्सवाद, लेनिनवाद व माओत्सेतुड विचारधाराया सिद्धान्त थुइकः राजनीति गरिब व ज्या साड नैपुं ज्यापु ज्यामि वर्गया उत्थानया निंतिं याय्मः दक स्यँ स्यं वयो च्वंगु खः । थौं या नेकपाया बिजोग वहे मार्क्सवादया लाँपु फहिइक जूगुलिं प्याहाँ वगु खः । थ्वहे समसामयिक राजनीतिया परिवेशय् च्वडः नेपाल मजदुर किसान पार्टीया नायो नारायणमान बिजुक्छँ (का.रोहित) जु नपां याडागु खँलाबला-सं

न्ह्यस : मेमेगु पुँजीवादी पार्टी तयसं पद व घेबाया लागिं आन्दोलन व चुनावी प्रचार-प्रसार याडः च्वंगु इलय् नेपाल मजदुर किसान पार्टी देडांक थी थी जिल्लाय् स्तालिन व माओत्सेतुडया बुदि हाड जनताता राजनैतिक सचेतनां ग्वाकः च्वना । थये छाय् पाःगु थें?

लिस : धात्थें खय्क हे अः नेपाल मजदुर किसान पार्टीया क्वय्क्वय्या प्रारम्भिक तह निसैं जिल्ला नपां वर्गीय व पेशागत संगठन (समाज) तयसं (साल) दाँ व न्हि ल्या काथं संसारया मानव समाजय् पुँजीवादी ब्यवस्था पाखं हाँग लिसैं ल्यंथाडः ह्युपा हयो समाजवाद व साम्यवादी समाज निस्वानय्गु दीर्घकालीन नपां तस्कं कष्टसाध्यगु उद्देश्यया निंतिं ज्या साड द्युपुं चिन्तक व न्हयलुवापिसं ब्युगु शिक्षापाखं नुगलं ध्वाथुइकय् वियगु मतिं वयकपिनिगु लुमन्ति नपां वयकपिन्ता हानेगु काथं, आदर प्वंकय्गु काथं विश्व सर्वहारा वर्गया गुरुपुं स्तालिन व माओया बुदि डाय्क च्वंगु खः । उब्ले संगठन व समाजया पासापिसं वयक पिनिगु जीवनी ब्वडः, काड, थुइकः न्हयाकगु पला लिपा वयकपिनिगु च्वसुत व साफूत ब्वड अन्तरक्रिया ज्या इवः नं न्हयाक च्वंगु दः ।

पुँजीवादी व राजनैतिक दलया नेतातयता शोषणय् आधारित जुइगु समाजवादय् हिलय्गु मखु सिं बरु वहे ब्यवस्था पाखं अपलं अपः आर्थिक रुपं भिंजुइगु, थःगु प्रतिष्ठा च्वजायक म्वाय्गु मति तः तं उकिया निंतिं चुनाव पाखं वा जालसाजीयाड वा संसदय् खिचा ल्वाथें ल्वाडः अलय् देशं दुनय्या वा देशं पिनय्या शक्तिया बलं सत्ता कब्जायाय्गु मति तै ।

वर्गीय रुपं पाइगु धाय्गु वा अर्थ धाय्गु हे थ्व हे खः । समाजवादी व साम्यवादीपुं ज्या साडनैपुं ज्यापु-ज्यामि वर्गया निंतिं शोषण मरुगु समाज निस्वानय्गु स्वई । नपां छगू वर्गबिहिन व राज्यबिहिन समाज निस्वानय्गु मति तै ।

विश्व क्रान्तिया दीर्घकालीन उद्देश्य थ्व हे खः ।
न्ह्यस : सिद्धान्तं दुमग्यपुं मनुतयता 'मिपुं मसु थःपुं काथं सांसद याइगु व थःता बांलागु मिंगु थाय् वा पद हे मः दक भागवण्डा याड कायो च्वंगुया लिच्चः व तःतः हांगु



पार्टी घःपुं व सत्ताय् तांपुं पार्टीतयसं अः भोगय् राय्मःगु स्वः लाकिं?

लिस : नेपाली कांग्रेस, नेकपा (एमाले), माओवादी, जनमोर्चा, मधेसवादी दल, राप्रपा) नपांया पुँजीवादी राजनैतिक दल तयपुं नेतातयसं छगू हे उद्देश्य तै । भिंपुं मनुत स्वयो थःपुं मनुत सत्ताय् यंकय्गु व सरकारी धुकुती भागवण्डा याड इड नय्गु स्वै । डाँकातयसं लुटेयाड हःगु सम्पति इड नः थें पुँजीवादी पार्टीतयसं इड नै ।

पुँजीवादी नेता तयसं जनताता गथे शोषण याय्मः अलय् गथे भांग लायमः धाय्गु फुक्क खौं ज्याखय् पोख्त व परिपक्व जुय धुकु च्वनि । अमिता प्रजातन्त्र, समाजवाद व साम्यवाद मःगु मखु । क्रान्तिकारी सिद्धान्तं परिपक्वपुं नेतातयता जक मखु इमान्दार कार्यकर्तात नपां अमिसं स्वीकार याइ मखु बरु अमिसं सार्वजनिक जग्गा, गौचरण देवालय, शिवालय, पुखु, विहार, मठ-मन्दिर, सीमसार नपां ल्वहँचा, फि व मेमेगु खानीत थःगु फाइदाया निंतिं स्यंकः बर्वाद याइपुं, गुँ छ्याडः आनाया सिमा, वन्य जन्तु खुयो मिययकिपुं ठग व अपराधीतधय्पुड तय् यःकि । अजपुं मनुत हे पुँजीवादी दलयाय्पुं तस्कं बांलापुं समर्थक व अमिपुं थः पुं मनु जुई ।



इयस्त्वंगू स्वप पौ. बःछि पौ(पाक्षिक)

अमिसं इमान्दार कर्मचारीत यःकि मखु, तप्यंकः कित्तैज्या सानिपुं जग्गा दलालत, बैक व बचतया धेबा लिनयया लुखातं लिकायो छ्यलिपुं, विदेशी धेबा नयो देशय गोप्य खाँत पिता छ्वैपुं, विदेशी पुँजी खय् लबः नयो थःगु दे व थपुं जनताया हि त्वनि, पुं, तः तः हांगु प्रोजेक्टत लाहातय् कायो डादाया दुनयँ दय्के मःगु हिदा बिकः दुं मखुसा ब्यां लबः नइपुं, नपां देशय् दुनय्या लाँ, ताँ, प्रोजेक्ट (योजना) भत्ताभुंग याड विकासया लाँपुइ पंगः थानिपुं मनूतय्या तपुयो बिइपुं कर्मचारीत यः कि ।

अजपुं पुँजीवादी नेतातयसं भिंगु, निष्पक्ष व ऐन कानुन काथं मखु घुस नयो निर्णय याइपुं अधिकारीपुं व न्यायाधिशत यःकि । घुस नकिपुं व घुस नैपुं मनूत थःपुं हे याड च्वनि । अलय् मज्यू-मज्यूगु व मभिंगु ज्या याय्याता व याकेता हे अपुं मुख्य-मुख्य पदय् वानय्यु स्वई । अलय् अजपुं च्वय-च्वयया पदय् वापुं व तः तः हांगु भ्रष्टाचारी पिनिपाखं धेबा कायो च्वनि ।

अजपुं अपलं मनूतय्यु लाहातय् सत्ता लाड च्वंगुलिं हे थौं देशभत्ताभुङ्ग जुयो च्वंगु खः ।

न्ह्यस : कः स्तालिन व कः माओ पासं जनतां सय्के मःगु छु छु खः?

लिस : कः स्तालिन व कः माओया शिक्षाया मू खाँ हे दे व जनताया निस्वार्थ रुपं सेवा याय्यु खः । जनता धायपुं अपलं बहुमत ज्या साड नैपुं ज्यापु ज्यामित खः । ज्या धायबलय् शारीरिक व बौद्धिक जुई । ज्यापु-ज्यामि, वकिल, प्राध्यापक, वैज्ञानिक, निस्वार्थ रुपं देश व जनताया सेवा याइपुं उद्योगपतित व्यापारी व व्यवसायीपुं, देशभक्त सिपाही, कर्मचारीपुं युवा व्वनामिपिन्ता देशभक्त व आमूल परिवर्तनया निंतिं तयार याय्यु फुक्क सिया कर्तव्य खः ।

न्ह्यस : थःगु वर्ग व वर्गीय भावना थुइकय् मफू तलय् हकातं-लिकातं न्ह्याकातं जूसां वहे भ्रष्ट स्वःपा त चुनावं त्याक वै । मार्क्सवाद, लेनिनवाद व माओ विचारधारां जनताता गथे सचेत याड बेइमानत पासं छुटकारा याय् फैं थें ? छुं खाँ काड दी लार्थे ?

लिस : वर्ग संघर्ष धाय्यु 'जादु' याड 'छु मन्तर' याड याय् फैं धाय्यु मति तःसा गलती जुई । गथे बुँ मपःसिं, वा मप्यूसें, वा मलसिं, वा मपासिं, कलघरय् मयंकसिं, जाकी ह्यानिं हासां महःसिं, जा थुय ज्यूगु जाकी जुइ मखु अथेहे बुई गः म्ह्यो, देचा मकःसिं, उकिता मः काथं मेगु फि, चा ल्वाक मछ्यासिं, छपला-छपला याड मेहनत मयासा गथे चाया भाला छिय फैं ? कपाँय् माँ मप्यूसें गथे कपाँय् ह्वई ? कपाँय् मथ्वसें गथे क्वापी वा का मरुसा तामय् यंक गथे थाज्या थाड काप थाय् फैं ?

मार्क्सवाद व लेनिनवादया चिच्या-चिच्या हांगु पाठ हे मकांसा गथे न्हूगु पुस्तां थुई अः हलिमय जूगु थी थी दे या किसान

व मजदुर आन्दोलन व क्रान्तिकारीपिन्ता म्हामसिइकः गथे जनताता थुइकय्यु ? थाकुमचःसें जनताता अजपुं विश्वया महान क्रान्तिकारीपिनिगु खाँ काडः थुइकः, ग्वाकय् मफू तलय् थः थः गु स्वार्थत दुनुगलं निसें खिति तुइकः थें तुइकः छ्वय मफूतलय् वं मेम्हा न्हँम्हा मनू गथे दय्के फैं ? थी थी देया स्वार्थी, विश्वासघाती नेतातय्यात दुरुख्य् वांम्हा भुजिं थें हाकुतिड मछ्वयकः गथे पार्टीत क्रान्तिकारी जुई ? भ्रष्ट स्वःपा त उलः, वाँ छ्वयो अलय् नंख्य् किगु धूथाथा मयाकं गथे न्हँगु समाज दय्के फैं ? चां न्हि मधःसें थाकु अःपु मधःसें परिश्रम व संघर्ष पुलांपुं ठग व खुँ तय्यु स्वः समाजं वां छ्वई गुब्ले जनताया मनया खिति तुइकः यचुक न्याचुक बिय फैं ।

न्ह्यस : माओ व स्तालिनया छु छु रचनात व्वनय्यु सल्लाह बियो दी थें?

लिस : मार्क्सवादी-लेनिनवादी साहित्यया अध्ययन याय्यु छसिकाथं थुइकय् अःपुगु सरल रचनाखं पला छिय्यु बांलाई । गथेकी -मार्क्स व एंगेल्सया कम्युनिष्ट घोषणा-पत्र, एंगेल्सया- 'साम्यवादया सिद्धान्त', लेनिनया 'गामय्या गरिबपुं नपां' वामपन्थी साम्यवाद छगू मचाखाचाया ल्वय् स्तालिनया समाजवाद व अराजकतावाद' लेनिनवादया आधारशीला सोभियत कम्युनिष्ट पार्टी (बोल्सेविक) या इतिहास, माओत्सेतुड या 'वर्ग परिचय', हुनान प्रान्तया किसान संघर्ष, ऐनानय् साहित्य व कलाबारे प्रवचन', व्यवहार आदि ।

थःथःगु देशया परिस्थितिं फवं थें या आवश्यकता हाँगु निसें हे अध्ययन याय्यु विषय व न्हँ न्हँ पुं कार्यकर्ता पिनिगु निम्ति व मौलिक रचनात व्वनय् बलय् छसिकाथं मवानय् फः । अध्ययनया विषय पार्टीया कक्षा न्ह्याकय्यु नपां नं स्वापु दःगु विषय नं खः ।

न्ह्यस : थौं या इलय् नेपाली राजनीति नेगु जलाखाला देशं याड च्वंगु ज्याइतः या विषय छुं खाँ धायो दी लार्थे?

लिस : नेपः दे ता थःगु लाहापा टूलार्थें तय्यु भारतीय एकाधिकार पुँजीया पुलांगु हे उद्देश्य खः । वंगलादेश, श्रीलङ्का, सिक्किम, भारत, भूटान सम्भ्रौता, काश्मिरया न्ह्यसः, थजगु खाँ ज्या स्वयबलय् नेपः दुनय्या अनेक बेमेलपाखं फाइदा कायो भारतं न्ह्यागु काथं नं फाइदा काय्यु याड च्वंगु दः, स्वयो च्वंगु दः । मदिक्वक भारतीय विस्तारवादं अनेक जालसाजी व तछ्याय्यु, थः वं थः ल्वाकय्यु, ल्वापुया मिपुसा हवलय्यु ज्या याड वंगलादेश वा सिक्किम थें याय्यु स्थिति ह्य्यु काथं ज्या साड च्वंगु दः । भारतं नेपःया छुं नं शक्तिता बल्लाकय् मब्यूसें थः व थः वय् ल्वाकः नेपःया कमजोरी खं फाइदा काय्यु स्वइ । वयागु इच्छा वहे खः ।

उत्तरी जलाखालां विकसित बल्लाम्हा अलय् पासाकाथं व्यवहार याइपुं मित्रवत नेपःया आशायाइगु स्वाभाविक खः । विश्वक्रान्तिया दीर्घकालीन उद्देश्य समाजवाद हे खः ।

खप नगरपालिकाया च्याकगु नगरसभा उलेज्या



नगर प्रमुख सुनिल प्रजापति

सभासद पासापुं

खप नगरपालिकाया न्ह्यकगु नगरसभा २०७७ असार ७ गते न्ह्याडः असार १६ गते क्वचःगु खः । उगु सभां आ.व. २०७७/७८ या नीति व कार्यक्रम व बजेट पुस २९ गते स्वीकृत यागु खः । सभाखं स्वीकृत यागु काथंया बजेटया सीमा दुनयँ च्वडः खप नगरपालिकां शिक्षा, स्वास्थ्य, विकास निर्माण, सम्पदा संरक्षण नपांया ज्या हज्याक च्वंगु दः ।

स्थानीय सरकार सञ्चालन ऐन २०७४ य् दाच्छीया नेक नगर सभाया बैठक च्वनय्मःगु बाध्यात्मक व्यवस्था दः । ऐनया वहे प्रावधान काथं थव च्याकगु नगरसभा खः ।

देशया राजनीति तस्कं काथं मछिंगु व स्वतुमतु स्वयो च्वंगु दः । देया दकलय् च्वयया सर्वोच्च निकाय प्रतिनिधि सभा विघटन जुयो न्हँगु निर्वाचनया न्हि ल्या नपां पिताबिय धुंकल । अथेनं निर्वाचन जुइ मजुइ छुं हे धाय् फःगु धःसा मरुनि । प्रतिनिधिसभा विघटनया मुद्दा सर्वोच्च अदालतय् विचाराधिन अवस्थाय् तयो तःगु दः । अदालतं उकिया उचित निर्णय याइगु जनतां विश्वास कायो च्वंगु दः ।

प्रजातन्त्रखय् निर्वाचित प्रधानमन्त्रीकय् 'संसद भङ्ग याय्गु गोलिं जःगु बन्दुक दै' धाय्गु मान्यता खः । थःगु दलया सांसदपिन्ता अनुशासनय् तय्ता व विपक्षी तय्सं सरकारता ज्या सानय मछिंक पंगः थांसा प्रधानमन्त्रीं न्ह्यागुनं इलय् संसद भङ्ग याय्गु अधिकार कायो तै । थवहे मान्यता काथं प्रधानमन्त्री केपी ओलीं प्रतिनिधिसभा विघटन यागुलिता स्वाभाविक राजनैतिक घटना क्रम काथं काय फै । प्रतिनिधिसभा विघटनया

इलय् स्थानीय तहखय् च्वड ज्या साड च्वडापुं जिपुं जनप्रतिनिधिपिनिगु भूमिका भन अप्वयो वगु दः । जिपुं जनप्रतिनिधिपुं भन सचेत जुयो ज्या सानय्मःगु दः ।

स्थानीय तह कार्यपालिका, व्यवस्थापिका व न्यायपालिका नपां या अधिकार दःगु निकाय खः । संघ व प्रदेश सरकारं थी थी त्वहः तयो स्थानीय तहया स्वायत्तता हे लाक काय्गु कुत याडः च्वंगु दः । संघ व प्रदेशं मदिकक कर्मचारीत छ्वयो ह्यगु ज्या याड च्वंगु दःसां खप नगरपालिकां अमिता लिता छ्वय्गु याड च्वंगु दः । अमिता हाजिर मयाकला दक अमिता वियमःक्व किछिया तलव अनुदानय् कटेयाड छ्वयो ह्यो च्वंगु दः । स्थानीय तहता मः काथंया कर्मचारी तय्गु अधिकार स्थानीय तहताहे दय्मः गु खौंखय् जिमिसं बः बियो वयो च्वडा ।

समपूरक व विशेष अनुदानया लागिं योजनाया सिफारिस स्थानीय तहं याय्गु अलय् संघ व प्रदेशं योजना ल्यय्गु नीति छतिं हे मिलय् मजु । थव बेक्वयक स्थानीय तहता केन्द्रं क्वत्यलय्गु ज्या खः । नेपःया संविधान काथं संघ, प्रदेश व स्थानीय तह सुं सुयाय्गुं अधिनय् च्वनय् म्वँ । फुक्क तह थः थः गु लागाय् स्वायत्त खः । स्थानीय तह योजना कार्यान्वयन याय्गु महत्वपूर्ण निकाय जूगुलिं देशय् विकास निर्माणया अपलं बजेट स्थानीय तहलय् छ्वयो ह्यमः । स्थानीय तहखय् अपलं बजेट छ्वयो हःसा विकास निर्माणया ज्या थौं स्वयो चतारं हज्याई ।

प्रधानमन्त्री के पी ओलीं छुं ई न्ह्यौं 'प्रदेशत संघया कचा जक खः' धायो दिल । छुं नं त्वहखय् स्थानीय तहलय् नियन्त्रण याय्ता स्वइगु हस्तक्षेप खः । न्ह्यागु हे काथंया हस्तक्षेप नगरपालिकाता स्वीकार्य जुइमखु । स्थानीय तहया पूर्ण स्वायत्तताया निंतिं जिपुं मदिकक ल्वाड च्वडा, ल्वाडं तुं च्वनयँ ।

थुगुसिया आ.व. सुरु जुयवं हे कोभिड-१९ या कारणं फुक्क क्षेत्र प्रभावित जुल । अथेनं नगरपालिकाया जनप्रतिनिधिपुं कर्मचारी पिनिगु मंकः कुतलं व नगरबासीपिनिगु धेबां काय मरुगु ग्वाहालीं जिपुं थजगु इलय् नं थःगु ज्या मदिकसें न्ह्याड च्वनय्गुलि छुं हदतक सफल जुयो च्वडा ।

न्ह्यकगु नगर सभां रु. १ अर्ब ८२ करोड ४० लाख तका दांया बजेट पारित यागु खः । क्वय्च्वयो तया काथं आय ब्यय दःगु खौं ब्याक च्वडा ।

चालु खर्चपाखय्

चालु आ.व. २०७६/७७ य् ९९ करोड ८० लाख तका



इयस्तंगूगु खवप पौ. बःखि पौ(पाक्षिक)

दां विनियोजन यागुलि २०७६ पौष मसान्त तकखय् ३६ करोड १७ लाख २२ हजार तका दां जक खर्च जुला । चालु आ.व. २०७७/७८ य् १ अर्ब २ करोड ६६ लाख ८९ हजार तका दां विनियोजन जुगुलि २०७७ पौष २६ गते तकया दुनय् २३ करोड ६० लाख ७० हजार ८ सय तका दां जक खर्च जुला । गुगु छखेलिइकगु बजेटया २२.९९ प्रतिशत जक खः ।

अथेहे पुँजीगत पाखय्

२०७६/७७ य् पुँजीगत पाखय् १ अर्ब १३ करोड ३० लाख विनियोजन यागुलि २०७६ पौष मसान्त तक खय् २५ करोड १० लाख ९५ हजार तका दां खर्च जूगु खः । चालु आ.व. २०७७/७८ खय् पुँजीगत पाखय् ७५ करोड ३३ लाख ११ हजार विनियोजन यागुली २०७७ पौष २६ तक खय् ११ करोड ४३ लाख ९१ हजार ७ सय तका दां खर्च जूगु खः । गुगु छखेलिइकगु बजेटया १५.१३ प्रतिशत खः ।

थथे याड चालु आ.व. खय् मुक्कं १ अर्ब ८२ करोड ४० लाख तका दां बजेट पारित जूगुलि चालु व पुँजीगत पाखय् याड मुक्कं ३५ करोड ४ लाख ६२ हजार ५ सय तका दां अथे धाय्गु मुक्क बजेटया १९.२१ प्रतिशत जक खर्च जुला ।

आन्तरिक आय पाखय्:

खुकगु नगरसभां आन्तरिक आय पाखय् ६२ करोड तका दां (जग्गा मियागु बाहेकं) राजश्व मुनय्गु लक्ष्य तःगु खः । अः तक खय् २५ करोड १३ लाख १८ हजार तका दां कर असुल यागु दः ।

स्वास्थ्यः

चालु आ.व. सुरु जूसानिसैं समाजय् कोभिडया असर

अप्वयो वाडांतिं उकिं मपुंकः मडांक तय्ता दकलय् न्हँपां खरिपाटी २०० गू बेडया एकीकृत आइसोलेसन केन्द्र दयकगुलि ल्वचं पुंपुं अपलं ल्वगीत दयो वसेलिं उकियाताबिचः याड खवप नगरपालिका वडा नं. ९ ब्रम्हायणी ७५ गू बेडया आइसोलेसन केन्द्र दय्का । आइसोलेसन केन्द्रे नय्गु, प्रेशर स्वयगु व अक्सिजन परीक्षण भितामिन सी, सिटामोल, आयुर्वेदिक वासया ब्यवस्था याडल्वगि पिनिगु सेवा यातसा आना दःपुं छँ छँ आइसोलेसने च्वपिनिगु लागिं अनलाइन पाखं चिकित्सा सेवा, मनोचिकित्सक, आयुर्वेदिक चिकित्सक नर्स फिजियो थेरापिस्ट व जनप्रतिनिधि पाखं परामर्श सेवा प्रदान याडा ।

छँ छँ आइसोलेसनय् च्वपिन्ता विशेष पुचः पाखं फोहर मुनय्गु, डाम्हा स्वापु तय्पुं ब्यक्तिया ब्यवस्था, विदेशं व पिन्ता छँ, होटल व नगरपालिकाया आइसोलेसनय् च्वपिन्ता स्वय्ता गुम्हा कर्मचारीपुं तयो विशेष समितिया ब्यवस्था व ब्रम्हायणी आइसोलेसन केन्द्रया लागिं हिंस्वम्हा कर्मचारी या बिस्कं समिति दय्का । नपां नगरबासीपिनिगु स्वास्थ्यता बिचः याड सुथाय् ६:३० बजे निसैं अनलाइन शारीरिक ब्यायामया ब्यवस्था याड जनताया स्वास्थ्यता हःनय तयो ज्या साडा ।

कोभिड ल्वय मपुंकः मडांकः तय्ता अपलं खर्च जुइगु खानय् दःगुलिं उकियाता बिचः याड संघ संस्था तय्ता कोभिड ल्वय नियन्त्रणया लागिं ग्वाहाली याय्ता आग्रह याडा । स्थानीय सहकारी व मेमेगु संघ संस्था अलय् ब्यक्तिगत काथं रु ५ हजार तका निसैं २० लाख तका तकया ग्वाहाली बिला । थुगु आर्थिक वर्ष २०७७/७८ य् जक रु ४१ लाख ४४ हजार ग्वाहाली वगु

दः । व फुकक संघसंस्था व ग्वाहाली याड दय्पुं मन्तय्ता थौं या थुगु ज्या इवः खय् दुनुगलनिसैं भिन्तुना देछायो च्वडा नपां कन्हेया दिनय नं ग्वाहालीया आशा याडा ।

कोभिड ल्वयया ल्वगीत अप्वयो वसेलिं खवप नगरपालिकाय् पी सी आर परीक्षण मेसिन भीथाय् नं दय्मः जक माग याता । जिमिसं प्रदेश सरकार नपां मिलय् जुयो भक्तपुर अस्पतालय् पीसीआर परीक्षण याइगु मेसिन तय्केता बः याडा । मेसिन हयानिं खवपया जनताता अः पुल । वनं हौं तक नगरबासीत टेकु व धौ ख्यलय वाड पीसीआर परीक्षण याकेता बाध्य जुयो च्वंगु खः ।





इयस्वंगुगु स्वप पौ, बःखि पौ(पाक्षिक)

कोभिडया कारणं निजी अस्पतालं विरामीत जाँचय् मयासें थु थु धायो च्वंगुलिं अपलं ल्वगित विचल्ली जुला । अस्पताल मः जु जुं लाँ विचय् हे बिरामीत सीगु जिमिसं खाड च्वडा । भक्तपुर अस्पतालता कोभिड अस्पताल दयकसेलिं गरिब जनताता हकनं मेगु मार्का काय् फःगु खाँ याता बिच याडः ख्वप नगरपालिकापाखं न्ह्याक च्वंगु जनस्वास्थ्य केन्द्रता सुथाय् निसें बहनी छताइलय् तक ओपिडी सेवा न्ह्याक बिया । थजगु गम्भीर अवस्थाय् नपां न्हिं नेस निसें प्यस तक विरामीपिनिगु सेवा याडा । जनस्वास्थ्य केन्द्रं ब्यूगु ल्याकाथं साउन १ गते निसें पुस २५ तक खय् मुक्कं ५५,६९२ ल्वगि पिनिगु परीक्षण यागु दः । थये नगरबासी पिनिगु सेवा सुविधाखय् खट्य जुजुं नगरपालिकाया च्याम्हा जनप्रतिनिधिपुं व हिंडाम्हा कर्मचारीत कोरोना ल्वचं संक्रमित जुला ।

च्याम्हासिंग मिखाया उपचार केन्द्रं नगरबासीपिनिगु मदिकक मिखाया उपचार जुयो च्वंगु दः सा आयुर्वेदिक वासया बांलागु लिचवः वयो च्वंगुलिं उकियाता बिचः याड नगरपालिका पाखं आर्थिक ग्वाहाली याडः जिल्ला आयुर्वेदिक स्वास्थ्य केन्द्र पाखं वास इयगु ब्यवस्था याडा ।

कोभिडया ल्वगिपिन्ता बिचः याडः नेपाल सरकारं आइसीयु स्वयो भतिचा म्हवँ व अस्पतालया सामान्य बेड स्वयो च्वययाय्गु एच डि यू २५ बेडया स्वीकृत ब्यूगु दः । उकियाता न्ह्याकय्गु कुतः जुयो च्वंगु दः नपां ख्वप अस्पताल नं मथां हे न्ह्याकय्गु तयारी याड च्वडागु दः ।

आ.व. २०७७/७८ साउन निसें पुस २५ गते तक करागु ल्वय क्यान्सर मृगौला नुगः मस्तिष्कघाटया ल्वगि पिन्ता हिद्व तका दां ग्वाहाली याय्गु नीति काथं थुगु इलय् ५३ म्हासिनं ग्वाहाली काय धुंकगु दः उकिया लागिं ५ लाख ३० हजार तका दां खर्च जुय धुंकगु दः ।

थुगुसी अपाङ्गता जूपुं ८९ म्हासिता हवील चियर व सहयोग सामग्री इड ब्यूगु दः । नगरबासी पिनिगु स्वास्थ्यता बिचःयाड न्हपा बन्द याड तःगु छँ छँ नर्सिड सेवा न्ह्याकागु दः ।

भक्तपुर क्यान्सर अस्पतालय् तत्कालीन ब्यवस्थापन समितिया पदाधिकारीपिसं भ्रष्टाचार यागु खाँ प्याहाँ वसेलिं उकिया विषय छु खः दक छानविन याय्गु ज्या नगरपालिकां हःनय् न्ह्याकल । छम्हा हे पदाधिकारीपुं स्वापु हे तः मवसेलिं नगर प्रमुखया नायोलय् अस्पताल ब्यवस्थापन समितिं निःस्वाड अस्पताल न्ह्याकल । नगरपालिकाया विरुद्धय् उल्लेया ब्यवस्थापन समितिं सर्वोच्च अदालतय मुद्दा दर्ता यासेलिं विचाराधीन जुयो च्वंगु इलय्

नेपःया सरकारंगठन आदेश जारी याड उगु अस्पताल सरकारीकरण याता । अः क्यान्सर अस्पताल नेपःया सरकारया स्वामित्वय् वांगु दः, गुकिं जनतां दांकः सेवा सुविधा काय दैगु जुल । भक्तपुर अस्पतालता अभ् व्यवस्थित याड जनताया सेवा याकय्ता नगरपालिका पाखं फःगु ग्वाहाली याड वयो च्वंगु दः । उगु अस्पताल थुगुसी बागमती प्रदेशया उत्कृष्ट अस्पताल जूगु दः ।

शिक्षाः

थयं मथयं हिला हाँ निसें ब्वनय् कुथित तिडः तःगु दः । ता ई तक ब्वनय् कुथि तिड तः बलय् अपलं ब्वनामिपिनिगु पढाइखय् बाँमलागु लिचव लाइगु हे जुल । ब्वनामिपिनिगु पढाइखय् भ्या भाति हे समस्या मवयमः धाय्गु मतिं नगरपालिकां लकडाउनया इलय् निसे नगरदुनय्या ब्वनय्कुथि अनलाइन कक्षा न्ह्याकय्ता बः याता । गुलि नं ब्वनामिपिन्ता अनलाइन पाखं ब्वंकय्गु क्षमता मरु धाय्गु गुनासो वसेलिं २०७७ पुस १ गते निसें च्यागू, गूगु व हिगू तगिया ब्वनामि पिन्ता स्वास्थ्य मापदण्ड कायम याड ब्वनय्कुथि हे सःत पालं पः याड आखः ब्वंकय् बियगु ब्यवस्था यात । उगु ई याता परीक्षणकाल काथं स्वय धुडानिं माघ १ गते निसें ब्वनय् कुथि हे सःत आखः ब्वंकय्गु नगर शिक्षा समितिं क्वः छिय धुंकगु दः । थवनं हाँ नगरपालिकां शिक्षक, अभिभावक, थी थी शिक्षक संघ व विद्याथी प्रतिनिधिपुं नपां छलफल याडागु खः ।

कोभिडया असरयाता बिचः याड हिं छगू व हिं न्यगू तगिं ब्वड च्वंपुं ब्वनामिपिनिगु लागिं २०७७ साउन व भदौ नेलाया शुल्क छुट याय्गु व मेगु संस्थागत विद्यालयया खायँ धःसा स्वलाया फुक्क व मेबलय्या छुं भाति (आंशिक) छुटया ब्यवस्था याडा । स्थानीय पाठ्यक्रम पाखय् थुगुसी स्वंगू व च्यागू तगिया पाठ्यक्रम कार्यान्वयनय् ह्य धुंगु दःसा शिशु स्याहारया सुधारे ध्यान बियागु दः ।

भूगोल इतिहास, राजनीतिशास्त्र, नेपाल भाषा व संस्कृति ब्वनिपुं सकल नगरबासी ब्वनामिपिन्ता छात्रवृत्तिया ब्यवस्था याड तयागु काथं अः तक खय् मुक्कं ४९ म्हा ब्वनामिपिसं उगु विषय कायो ब्वड च्वंगुलि सम्बन्धित कलेजया लागिं डागू लाख व खुड च्याद्व धेबा पुलय धुंगु दः ।

धेबामता धायो सुं नं ब्वनामिपुं आखः ब्वँ वानय् मखानय् थः म्व धाय्गु मतिं शैक्षिक ऋणया ब्यवस्था याड तयागुलि नीम्हासिनं शैक्षिक ऋणया सुविधा कायो ब्वड च्वंगु दः । उकिया लागिं स्वीखूगू लाख नेद्व दां पुल विय धुनसा थुगुसीया आ.व. या लागि सूचं पिब्वयो च्वड च्वडा ।



इयस्वंगूगु स्वप पौ. बःछि पौ(पाक्षिक)

हिं छगूतगिं ब्वनिपुं ब्वनामिपिन्ता जाँचकायो ८७ म्हासिता छात्रवृत्ति वियूता सिफारिस यागु । च्यागु तगिंया आधारभूत तहया अन्तिम परीक्षाया बन्दोबस्त यायूता परीक्षा समिति दयकेगु ज्या हज्याकला । सामूदायिक विद्यालय भवन पुनःनिर्माण व भौतिक निर्माणता नं नगरपालिकां ग्वाहाली याड वयो च्वंगु दः ।

सम्पदा व कला संस्कृति संरक्षणः

कला संस्कृति व सम्पदा भीगु म्हासिइका खः । ख्वप नगरपालिकां थुकिता म्वाकः तयूता मदिक्व कुतः याड च्वंगु दः । श्व हे इवल्य डकगु नगर सभां ख्वप नगरपालिकाया कला, संस्कृति व सम्पदा संरक्षण नपां सम्बर्द्धन यायूता दयकगु ऐन २०७६ पारित याड अर्भ व्यवस्थित यायगु कुतः याडा । नगरया पुलांगु क्षेत्रता स्थानीय सरकार सञ्चालन ऐन २०७४ या दफा ९ (२) काथं सांस्कृतिक क्षेत्र घोषणा याड उगु क्षेत्रदुनयँ स्थानीय नागरिक मखुपिसं छँ जग्गा न्याय मिययाय् मरुगु व्यवस्था याता । अल्य् व्यक्तिगत स्वार्थता हःनय् तैपुं, सम्पदाया महत्व मथपुं नेम्हा पेम्हा सम्पदा विरोधी मनूतयूसं नगरपालिकाया थुगु महत्वपूर्ण ज्याया विरुद्धय सर्वोच्च अदालतय् मुद्दा दर्ता यागु दः । उगु मुद्दाय् नगरपालिकाया विरुद्धय अन्तरिम आदेश जारी याड उगु ऐन कार्यान्वयन मयायूता निर्देशन ब्यूगु जानकारी वगु दः । देया भाय्, कला, संस्कृति व सम्पदा म्वाकः तयूता लागिं दयकगु उगु कानूनया बारे न्यायालय सकारात्मक जुइगुलि जिपुं आशावादी जुयो च्वडा ।

सम्पदा व निजी आवास पुनः निर्माण व संरक्षणः

थुगु इलय् हलिमय नां जःगु लोकं हवागु डातापोल्हेँ देगः ल्हवनय्-कानय्गु ज्या क्वचाल । उगु देगः ल्हवनय्गु इवल्य् ४९८७ म्हा मनू तयूसं ज्याखं ग्वाहाली (जनश्रमदान) ब्यूगु, हिंङागु लाख व पी न्हय्द्वस्वयो अपः धेबाया आर्थिक ग्वाहाली व डगु लाख व खुइस्वद्व स्वयो अपः धेबा क्वतिया जिन्सी सामग्री ग्वाहाली काथं ब्यूगु जुल । श्व भी सकलसिया निंतिं लयूताया खौं खः । इनागः भार्वाच्च निसै च्याम्हासिगल्य् तकया लार्थेँ ल्वहँ तं सियागु, गय् भिंघो थाय् व छिपा ताँ दानय् धुंकलसा लायकुली च्वंगु बत्सला देगः, चपालय् भैल द्योया द्योछँ, ल्योसिंख्यलय् च्वंगु च्यासिं देगः, बाराही ताँ, विश्वकर्मा आगंछँ, मधिकर्मी छँ, रानी पुखु, भाज्या पुखु, इखालाछी मथ, तलेजु दुनेया सम्पदात नपां अपलं सम्पदात थुगु इलय् दानय् धुंकगु दःसा गुलिं सम्पदात ल्हवडः च्वंगु दः । जनश्रमदान, आर्थिक ग्वाहाली विइगु भावनायाता भीसं ल्यंकः तयूमः । सुयांगु ग्वाहाली मकःसिं सम्पदा म्वाकः तयूता भी सक्षम जुयो च्वडा दक छाती फर्केँ याडः गर्वाड धाय् फया ।

ख्वप नगरपालिका वडा नं. १ खय लागु ऐतिहासिक रानी पुखु ल्हवनय्गु विषयया विस्तृत अध्ययन प्रतिवेदन तयार जूगु दः । ख्वप नगरपालिका पाखं पुनःनिर्माण नपां जीर्णोद्धार जुय धुकगु व जुयो च्वंगु सम्पदाया किपा त मुडः छगू साफु पिथांगु दः ।

बजार अनुगमन

उपभोक्तापिन्ता व्यवसायीपिनि पाखं ठगय् मयाकयगु मति ख्वप नगरपालिकां मदिक्व बजार अनुगमन याड च्वंगु दः । अनुगमनया इवल्य् नवीकरण मयापुं, सुचुकुचु याड मतःपुं, पसः दर्ता मयापुं, म्याद फूगु सामान म्युपुं नपां नय मज्यूगु अखाद्यबस्तुत म्युपुं खानय् दःगुलिं मः काथं सुधारया लागिं सचेत यायूगु मालसामान जफत याड धू यायूगु कानून काथं दण्ड जरिवाना याड वगु जुल । थःगु हकया विषय सं उपभोक्ता थः हे सचेत जुयमः । सुनं व्यवसायीपिसं उपभोक्ता पिन्ता ठगय् यागु सूचं वय वं अनुगमन पुचं तरुन्त हे कार्वाही यायूगु व्यवस्था याड तयागु दः ।

देको मिवा इटापाके आवास योजना

ख्वप नगरपालिका वडा नं. २ व ६ खय लागु देको-मिवा इटापाके आवास योजना सञ्चालन जुयो च्वंगु दः । अःटेवा पःखः तक चा थानय्गु, माथाकय्गु, ज्या जुयो च्वंगु दः । उगु आयोजनाता नगरबिकास कोषं नीगु करोड तका दां ऋण काय्गु ज्या न्ह्याक च्वंगु दः । योजनाया स्वीकृति, रिप्लिटिड नीति काथं नक्सा सार्वजनिक याड जनताया गुनासो न्यनय्गु ज्या जुयो च्वंगु दः । जग्गावाला पिनिगु गुनासो लिपा उपभोक्ता समिति व सम्बन्धित समितिं छलफल याड गुनासोया न्यायोचित सम्बोधन यायूगु कुतः जुई ।

सुचुकुचु व लकसया सुधार

कोभिडया इलय् सुचुकुचु दकलय् महत्वपूर्ण जूगुलिं जिमिसं उकिता बः बिया । न्ह्याथिन्योगु हे पंगः वसां जिमिसं सुचुकुचु यायूगुलि भ्या भाति हे म्हवँ मयाडा । नगरपालिका दुनय्या सहकारी तयूता सामाजिक दायित्व बोध याकय्गु मतिं छगू सहकारी छगू थाय्या सुचुकुचु नीति हछ्याडा ।

फोहोर व्यवस्थापनया न्हूगु प्रविधि ह्यगु कुतलय् थी थी पक्षत नपां स्वापु तयो ख्वपया लागिं व्यवहारिक जुइगु प्रविधि दुता ह्यगु कुतः याड च्वडा ।

हनुमन्ते (खौंहेँ खुसी व कासनय् (खासाड खुसुड) खुसी फोहर जुयो गथे सफा याय् दक चुनौती जुयो च्वंगुलि आयोजना कार्यान्वयन निर्देशनालयनपां समन्वय याड खुसी सी बगलय् ढःतयगु ज्या क्वचाइथेँ हे च्वन । सल्लाघारी च्वंगु उपचार पुखु व ख्वप



इयस्वंगुगु स्वप पौ. बःछि पौ(पाक्षिक)

नगरपालिका ७ वडा हनुमानघाटय च्वंगु उपचार पुखु हकनं परिचालनय ह्यगु कुतः याड च्वडागु दः । सल्लाघारीया उपचार पुखु या निर्माणया ज्या जुयो च्वंगु दः सा हनुमानघाटय च्वंगु पुखु एशियाली विकास बैकया ऋण ग्वाहालीं पि आइ डि पाखं याडगु योजना ह्य्याड च्वडागु दः ।

भक्तपुर औद्योगिक क्षेत्र चिडकयगु विषय

खप नपा २ वडा ब्यासी च्वंगु घरेलु तथा साना उद्योग क्षेत्रय चलेयाड च्वंगु तःतः सः वयक ध्वनि प्रदुषण याडगु, कुँ, तेजाब पिकायो वातावरण प्रदुषण याडगु कारखानात चिडकः बिया दक स्थानीय जनतां माग यासेलिं अजगु टेक्सटाइल, डाइड, प्लास्टिक व रड्ग रोगन या कारखाना चिडकय बियता नगरपालिकां कुतःयाड च्वंगु दः । उगु उद्योग तयसं कानुन बमोजिम पुलय मःगु थ्यंमथ्य. छगू करोड तका दां मपूनि ।

अजगु उद्योग त चिडक छ्वयो आना साना तथा घरेलु उद्योग क्षेत्र काथं विकास यायगु कुतः जुयो तुं च्वनि ।

निजी आवास पुनः निर्माण

२०७२ सालया तः भवखाचां निजी व सार्वजनिक याड अपलं क्षति जगु दः । तः भवखाचा लिपा खप नगरपालिका दुनयँ ७६५६ परिवारत लाभग्राही सूचीखय नां दर्ता जगुलि ५६८१ परिवारं न्हपांगु किस्ता, २०९२ परिवारं नेकगू किस्ता व १८९१ परिवारं स्वकगू किस्ता काय धुंकगु दः । सरकारं बिडगु अनुदान तस्कं म्हँव जगु, किस्ताबन्दीखय धेबा बियगु, व तःम्हा सिया नामय लाड च्वंगु व अपलं विवादत दःगु लिं अपलं परिवारं अनुदानया धेबा काय मखानि । अथे जगुलिं खप नगरपालिकां फुक्क धेबा छकलं वियमःगु, अनुदानया धेबा हिगू लाख थ्यंकय मःगु, नगरपालिकाया सिफारिसया आधारय जग्गाधनी प्रमाण पुर्जा मरुपुं परिवारता नं अनुदान बियमःगु माग याड वयो च्वंगु खः ।

कासाः

वडाय वडाय तयो तःगु खुल्ला शारीरिक ब्यायामशालात कोभिडया कारणं बन्द जुयो च्वंगुलिं अनलाइन पाखं शारीरिक ब्यायाम याकेगु ज्या जुयो च्वंगु दः । भनपा १० बेखालय कभर्डहल निर्माण स्वीकृत जुयो ज्या हज्याकला ।

कृषि

थुगुसी किसानतय बुई बाली लगेयायगु इलय देसी सः मरु । नेमकिपाया छ्याञ्जे प्रेमसुवालया न्हयलुवाय खप नगरपालिकाया जनप्रतिनिधिपिनिगु नपांया पुचः किसान समस्या जोडः साल्ट ट्रेडिड लिमिटेड, कृषि सामग्री कम्पनी व कृषि मन्त्रीता नपालाड मथां सः हयो बिया दक आग्रह याडा । सरकारी

कोटा काथं दैगु सःता निश्चित भः क्वछिड मियता ब्यवस्था याडा । सः मियगुलि अनियमितता जुय फःगुलि बिचः याड सहकारीतयता मिडके वियता हदाय तला । सः मिडगु थासय अनुगमन जुयो च्वंगु दः ।

नेपःया सरकारया नीति काथं पकेट तरकारी खेती व पशुपालनया संभाव्यता बारे नं किसानत नपां छलफल याड च्वंगु दः ।

त्वनयगु नाः

मनू दःगु ल्याखं नाःया स्रोत म्हँवजक दःगुलिं दायँ दायँ पतिकं जनतातयता समस्या जुयो च्वंगु दः । नगरपालिकां के यू केयल नपां समन्वय याडः गना गना नाः छँ दः आना आना सिडकः नाः इड बियगु ज्या जुयो च्वंगु दः । अथेनं मः क्व नाः इड बिय मफयागुलिं जिमिता चिन्ता जुयो च्वंगु दः । मेलम्चीया नाः न्हपांगु चरणय हे ह्यगु कुतः जुयो च्वंगु दः ।

नक्सपास

आ.व. २०७७/७८ या साउन निसें पुस २५ गते तक खय खप नगरपालिकाय न्हँगु छँ दानयता २७२ गू नक्सा दर्ता जगुलि २४४ नक्सा पास जूय धुंकल । थ्व दर्ता जगु नक्साया ९० प्रतिशत खः । थुगु इलय ८२ खा छँ निर्माण सम्पन्न कःगु दः । पास जगु नक्सा या ३० प्रतिशत जू वै ।

अन्य

खप नगर दुनयँया थीथी थासय सडक बत्तीया व्यवस्था व आदर निकेतन तयगु ज्या नं हज्याड च्वंगु दः । नपां ल्यासे ल्याम्हो व मिसामस्तयता लाहातय ज्या दैगु सीप बियो च्वंगु दः ।

दकलय लिपा जिपुं जनप्रतिनिधिपिसं निर्वाचन घोषणापत्रया लिधंसाय नगर व नगरबासी पिनिगु भिं यायगु मतिं ज्या साड च्वडागु, नपां नरबासी पिन्ता वियागु बचन पूर्वाकयता मदिकक न्ह्याड च्वडागु दः । न्ह्याथिन्योगु पंगः वसां नगरबासी पिन्ता साथ ज्वडः हज्यायगु प्रतिबद्धता प्वंकः च्वडा । कोभिड १९ या थजगु ग्यापुगु इलय नं नगरबासीपिनिगु स्वास्थ्यता बिचः याड मदिकक नगरपालिकाया ज्या याता साथ व ग्वाहाली बियो च्वंगुं जनप्रतिनिधिपुं कर्मचारी व स्थानीय जनताता खप नगरपालिकापाखं दुनुगलं निसें सुभाय देछायो च्वडा ।

सुभाय

खप नगरपालिकाया च्याकगू नगर सभासं
नगर प्रमुख सुनिल प्रजापति जुं बियो द्यगु न्वचु

२०७७/९/२९



सु मिलिसैं म्हिती व मिखय् हे सी ! सु नाखय् म्हिती व नाखय् हे सी !

क्रिश्चिना

नेपाली कांग्रेस, नेकपा व मधेसवादी थजपुं नेपः या शासक दलया ज्या इवःत स्वयबलय् च्वय न्हि थाडागु छेयौं(शीर्षक) नुगलय् ध्वाचू वई । नेपाली कांग्रेस सत्ताय् च्वड च्वंबलय् जुम्लाय् नं त्याक वम्हा नेपाल मजदुर किसान पार्टीया छम्हा सांसदता अपहरणया पहलं विराटनगर जुयो भारतय् यंकला । एमाले नं सरकार दय्केगु निहूँ खय् नेमकिपाया पाखं दैलेखं त्याक वम्हा मेम्हा छम्हा सांसदता अपहरण याता । उब्ले नेमकिपाया नायो नपां सांसद का. रोहित जुं नेपाली कांग्रेस व एमालेता संसदय् 'सु मिलिसीं म्हेती व मिखय् हे सी, सु नाखय् म्हिती व नाखय् हे सी' दक धायो द्यगु खः ।

बुलुहूँ नेपाली कांग्रेस व एमालेखय् नं चिरीबायो तज्याड वल, उखेनं थुखय्-थुखय् नं उखय् लुतुलुयगु, पद व धेबाया लागिं फोहरी कासा म्हेतय्गु सुरु जुल । अलय् भारतय् आयाराम व गयाराम थजगु लज्यामरुगु राजनीतिया नामय् अनैतिक व चरम अपराधया घटनात अप्वयो वल । राजनैतिक अपराधय् अड्कुश क्यंकय्गु पलि जिल्ला जिल्लाया कार्यकर्तात स्यंकय्गु व नेमकिपाता तछ्याय्गु ज्या वहे शासक दलं याडं तुं च्वना । कर्णाली, लुम्बिनी, सगरमाथा, नारायणी अञ्चल जू जू देशय् दक्व थासय् नेमकिपाया कार्यकर्तातय्ता भारत व युरोपय् तकयाय् नं छात्रवृत्ति बिडकय् बिला नपां अमिता युवा-विद्यार्थीया अन्तर्राष्ट्रिय संगठने थ्यंक भ्रष्ट याड त्वः तला ।

छम्हा एमालेया मन्त्री धाला-विश्वविद्यालयया छात्रावासया जा जकनक हे दैलेखया छम्हा विद्यार्थी नेताता एमाले खय् दुकायागु खः । अजपुं जा भाते कम्युनिष्ट ब्वलांक यंकगुया लिच्वः काथं थौं नेपाली कांग्रेस, नेकपा, सद्भावना पार्टी नपांया अजगु पार्टीखय् थः थमं प्युगु काँ भवँचिड वयो च्वंगु दः । सम्भवतः उकि विदेशी तय्गु नं लाहा दै । नेमकिपा थःगु हे थासय् च्वडः देश व जनताया सेवा याय्गुलि समर्पित जुयो च्वंगु दः । अथेनं नेमकिपाता हाँगलिसैं हे ल्यं थानय्गु उदेश्य ज्वड ज्या साड च्वंपुं शासक दलया नेतात थः थः हे छगू दलं मेगु दलय् वानय्गु 'नर्क' या लाँपुई हज्याड च्वंगु दः ।

त्वालय् गां-गामय, गल्ली-गल्ली, च्या पसलय् अजगु खाँया चर्चा परिचर्चा नपां शासक दलया शासनया बारे पिब्वयो च्वंगु बुँ खाँया छ्यौलं शासक पिनिगु डतलय् नैतिकताया थपड नकः च्वंगु मति संवेदनशील मतदाता तय्संयाड च्वंगु दः ।

(अख्तियारं क्यड बिल स्वंगुं तुं सरकारया भ्रष्टाचार प्रवृत्ति राजधानी १२ पुस २०७७)

भ्रष्टाचारया कारणया बारे समाचारे धायो तःगु दः । थिकय्गु निर्वाचन प्रणालीया हुनिं भ्रष्टाचार अप्वगु जुल, सदाचार व नैतिक आचरण त्वःत विचलनय् वगु, राजस्व चुहावतय् मदिकक याड तुं च्वंगु सार्वजनिक खरिद ऐन हाचांगायो वांगु, उपभोक्ता समितिता खः थें जक याडः ज्या सांगु, जग्गा दर्ता

सम्बन्धीया फाइल व मिसिल हे ताकिगु प्रवृत्ति, ठेक्काखय् सरकारी अधिकारी पिनिगु अपलं मिलेमतो, कृषि अनुदानय् अपलं अनियमितता जूयो च्वंगु, विचौलिया प्रथां भन अपः हाँगः कायो वगु, गैरकानुनीसम्पतियाता शुद्धिकरण याय्गु प्रवृत्तित अप्वयो वगु आदि ।

नेपालय् सम्पति शुद्धिकरणया नीति व विधेयक हःपुं नेपाली कांग्रेसया सरकारया डा. राम शरण महत हे खः । थथे याड भ्रष्टाचारया निमित्तं भूमिका ग्वःपुं घायँ पुयो सौ सः याय्गु फुक्क ज्याखय् नेका, एमाले, राप्रपा, एमाओवादी, सद्भावना व सरकारय् वांपुं मधेसवादी दलत नपां सत्ताय् च्वड अनैकौं छलछाम याडम्हा बाबुराम भट्टराई थजपुं फुक्क नेतात जिम्मेवार खः ।

राजनैतिक दल व केन्द्रीय नेता तय्सं हे प्रदेशया नेतात तयार यागु खः । प्रदेशस्तरया नेता तय्गु हे छत्रछायँ खय् स्थानीय सरकारया जनप्रतिनिधित व नेतात ब्वलांगु खः । उकिं कर्मचारी, भ्रष्टाचारी व अराजक जूगुलि शासक दल याय्पुं हे कर्मचारी युनियनता म्वःमरुगु थासय् छ्यल यंकगु हे दोषी खः । सरकार क्वः थय्गु, निर्वाचनय् मतपत्र खुयो काय्गु बूम्हासिता त्याकय् बियगु निसैं फुक्क अनियमित ज्या खय् शासक दलया नेता व मन्त्री तहे जिम्मेवारी खः । भारतपाखं हे ज्ञान (शिक्षा) कायो व पुं वहे नेतात पाखं व अमिगु थें हे पहः पिकायो साड च्वंगु ज्या खं जनतां भन भन दुःख सियो च्वंगु दः ।

शासक दलया नेतातय्गु स्वार्थ देश सङ्कटय्

विवेक

प्रधानमन्त्री केपी ओली नेकपा दुनं हे सरकारता 'घेराय् कुनय्गु' स्वगु खौं पिब्वसेलिं २०७७ पुस ५ गते प्रतिनिधि सभा भङ्ग याङ्गु जक धाला । प्रतिनिधिसभा विघटन याय् धुकः नेकपा सियदय्क नेगू गुट (ओली व दाहाल-नेपाल) खय् छवः किला । पार्टी तज्यात, नेगू क्वचा दल ढकः धःसा औपचारिक रूपं नेगू गुटं धःगु मरुनि । थः थः गु गुटता आधिकारिक पार्टी दाबी यायां नेगू गुटनिर्वाचन आयोगय् वाना । नेगू पक्ष थः विपक्षयाता तस्कं क्वहय्गु खौं गवः लं म्हतु ल्हाड छम्हा छम्हा सियागु जात प्वलः च्वंगु दः । गुगु राजनैतिक संस्कारं पिनय् ला ।

प्रतिनिधिसभा विघटनता कायो गुलिं राजनैतिक दलत व कानुन व्यवसायीपिसं 'असंवैधानिक कदम' 'संवैधानिक कु' 'प्रतिगामी कदम' धाधां सरकारया विरोधय् लार्थं वयो सडक आन्दोलन याङ्गु च्वंगु दः । अमिसं सर्वोच्च अदालतता प्रभावित याय्गु कुतः याङ्गु च्वंगु दः । न्यायपालिकां सुयांगु ख्याच्चः व प्रभावय् मच्चंसं स्वतन्त्र न्याय बिङ्गु विश्वास याङ्गु च्वंगु दः । अथेज्गुलिं न्यायपालिकाता जनताया आस्थाया केन्द्र जक धाई । प्रतिनिधिसभा विघटनया सिफारिसविरुद्ध तःगु हिंस्वंगु रीटत अदालतय् विचाराधिन जुयो च्वंगु इलय् यक्व सिया ध्यान हे सर्वोच्च अदालतय् लाङ्गु च्वंगु दः ।

संविधान व कानुनया ब्याख्या याय्गु अधिकार नेपः या संविधानं सर्वोच्च अदालतता बियो तःगु खः । कानुन ब्याख्याया सिद्धान्तकाथं कानुनया ब्याख्या याङ्गु उकि व्यवस्थापिकाया भावना नं दुथ्यागु (प्रतिबिम्बित) ज्गु जुयमः । व्यवस्थापिकां कानुन दयकिगु व उकिया ब्याख्या सर्वोच्च अदालतं याङ्गु इलय् गुब्लें गुब्लें व्यवस्थापिका या भावना नपां ज्वः मलाताला जक न्हयसः नं मदांगु मखु । अः नेकपा दुनय्या दाहाल -प्रचण्ड समूहनिसें नेका नपां थी थी राजनैतिक दलत सर्वोच्च अदालतया निर्णयपिङ्गु च्वंगु दः ।

नेपः या संविधानया धारा ७६ (७) काथं प्रधानमन्त्रीता मध्यावधिखय् वानय्गु गनां हे अधिकार मरुगु तर्क नं छगू नेगू दलं अलय् कानुन व्यवसायी पिसं याङ्गु च्वंगु दः । संसदय् मिलिजुली सरकार व अल्पमतया सरकार निस्वानय्गु सम्भव मदैगु अवस्थाय्

जक उगु धारा ७६(७) आकर्षित जुङ्गु तर्क अमिगु दः । ओली सरकार संविधानया धारा ७६ (१) काथं निस्वांगु थयं मथयं दुई तिहाइया समर्थन दःगु सरकार खः । संसद विघटन हौं तक नं उगु समर्थन ल्यं दःगु हे तिति । बहुमत दःम्हा सरकारता थःगु हे दलं ज्या सांकय् मब्यगु इलय् प्रतिनिधिसभा विघटन याय् मदैगु धायो तःगु मरु । गुगु ज्या याय्मरु धायो तःगु मरु व ज्या याङ्गुबलय् असंवैधानिक जुय फैमखु बरु उकिं कानुनी ब्याख्याया माग याई । बहुमत दःम्हा प्रधानमन्त्री राजिनामा ब्यगु इलय् देश भन राजनैतिक सङ्कटय् फसय् जुङ्गु, देया सार्वभौमिकता, स्वतन्त्रता व बैदेशिक हस्तक्षेप नपां शान्ति सुरक्षा खय् नपां तप्यंक असर लाङ्गु खानय् दःसा अजगु इलय् प्रधानमन्त्री देशता जोगय् याय्ता संसद विघटन याङ्गु न्हँगु जनादेशय् वानय्मरु धाय्गु खौं हे दैमखु ।

संविधान कानुनी जक मखु राजनैतिक दस्तावेज नं खः । अदालतं राजनैतिक विषयलय् अपलं संवेदनशील जुयो विवेकपूर्ण ब्याख्या याङ्गुलि जनतां आशा याङ्गु च्वनि । संसदीय व्यवस्थाखय् संसदीय दलया प्रमुख प्रधानमन्त्री हे जुई । दलयानेता वा प्रधानमन्त्री थःगु दलया सांसद व विपक्षी दलया सांसद पित्ता अनुशासनय् चिङ्गु तय्ता प्रधानमन्त्रीकय् 'संसद विघटन याय्गु गोली जःगू बन्दुक' दैगु संसदीय व्यवस्थाया मान्यता खः । बहुमतप्राप्त सरकारं थःगु दलया सांसदपित्ता अनुशासनय् तयो तय्मफुसा देशय् राजनैतिक स्थिरता दैमखु ।

नेदा हौं एमाले व माओवादी पार्टी एकता जुला धःसां व पद व भागवण्डाया लागिं यागु सम्भौता जक खः । छप्पा छधि जुयो एकता याङ्गु धःगुया अर्थ पार्टीया सिद्धान्त, बिचः नीति व कार्यक्रमय् नेगू पक्षया सहमति खः । अलय् एमाले व माओवादी छगू हे घोषणा पत्र व (फरक फरक) नेगू चुनाव चिं कायो निर्वाचन ल्वागु खः । राजनीतिखय् असम्भव धाय्गु छुं हे दै मखु धाय्गु अघोरी बाबा शैलीया एकतां नेकपाता थौया अवस्थाय् थेंकगु खः ।

सकसिनं स्प्युगु हे खौं खः । प्रचण्डं भारतया ग्वाहालीखय् हिदा तक सशस्त्र संघर्ष यागु खः । उगु संघर्षय् हिं न्हय्दु नेपः मि पिनिगु ज्यान वाना । नेपाल मजदुर किसान पार्टी माओवादीता



इयस्वंगूगु स्वप पौ. बःछि पौ(पाक्षिक)

‘ट्रोजन हर्स’ या नां छुक गु खः । माओवादीत तः क हे सरकारे वान अलय् भारतता भिं जुइगु बाहेकं भ्नीगु दे व जनताता भिं जुइगु छुं हे ज्या मया । संविधान दय्केगु इवल्य् प्रचण्डं भारतता ग्वाहाली मदयक संविधान दय्के फैं हे मखु जक धःगु खः । उब्ले नं नेमकिपां उकिया म्हुतुप्व तिक लिसः ब्यगु खः । प्रचण्ड नपां हिदा तकयागु सशस्त्र संघर्षया इलय् भारतं ब्यगु ऋणया भारी दः । उकिया माँ व ब्याज लिताकायता भारतं न्ह्याब्लें मौका पिड च्वंगु दः ।

संविधानया न्हापांगु निर्वाचनय् प्रचण्डया शक्ति अतिकं च्वजःगु खः । उगु इलय् नेपाली जनतां माओवादीं छुं याइला धाय्गु छुं भाति आशा यागु खः । उगु निर्वाचनय् माओवादीं प्रत्यक्षय् बहुमत यागु खःसा फुक्क सभाख्य थ्यं मथ्यं बहुमतया स्थिति तक थ्यंकगु खः । अलयनं वं गुब्लें हे जनताया भिं जुइगु ज्या याय्गु मस्व । सेना प्रमुख कटुवालया कारणं प्रधानमन्त्री पदं राजिनामा ब्यूसेलिं व न्हिया न्हिथं लैन थें थः थमं क्वम्ह्यो क्वहें क्वहें वान । थौं नं सडकय् वापुं दलतयसं शिक्षा, स्वास्थ्य, देशी सः(रसायनिक सः) बजार भः थिकय् जूगु, भ्रष्टाचार नियन्त्रण, बेरोजगारी थजगु जनताया समस्या ज्वड सः छसः हे तःगु मरु । अमिसं न्ह्याथाय् याड जूसां सरकारे वानय्गु जक मतिं ज्या साड च्वना ।

प्रचण्डं न्ह्याक्व हे घमण्ड यासां न्हापायाय्पुं माओवादी विप्लव, वैद्य, बाबुराम पुं बिस्कं च्वनय् धुकपुं खः । इज्जत जक तय्गु मतिं प्रचण्डं स्थानीय चुनावय् नेकांनपां व संसदीय चुनावय् एमालेनपां मिल्य् जुयो चुनाव ल्वाय् मःगु धात्थेंगु खौं सुनं मस्यगु दः । अः माधव नेपाल व भूलनाथ गुटं प्रचण्डता नेकपाया नेता दय्कला । प्रचण्ड नेकपाया छक क्यनय्ता जक हः नय तःम्हा निमित्त नायक जक खः । ओली व प्रचण्डया औपचारिक काथं पार्टी बायो वांगु दि निसें प्रचण्डया दिन ल्या खाड ह्य धुकल ।

अः शासक दलया नेम्हाप्यम्हा नेता तय्गु ब्यक्तिगत स्वार्थया कारणं राजनैतिक सडकट पिब्वःगु खः । नेपाली कांग्रेस संसद विघटनया विषय अः तक थःगु स्पष्ट धारणा तःगु मरुनि । नेकपाया न्वकु वामदेव गौतम अः तक थुगु हे पक्ष दक छुनं गुटया बारे धःगु मरुनि । वयक निर्वाचन आयोगं गुगु पक्षता आधिकारिकता बिइ उकिया पक्षय् वानय्गु दाउ स्वयो च्वंगु दः । नेपाल थजपुं नेता तय्गु ब्यक्तिगत स्वार्थया सिकार जुयो च्वंगु दः ।

कोभिड ल्वयया कारणं देया आर्थिक अवस्था भ्रण्डै धू हे याय् धुकल गुला हिला हाँ निसें ब्वनय्कुथित, कलेजत, विश्वविद्यालयत बांलाक चाय्के फःगु मरुनि । जनताया जीवन

भन भन स्वतिड वाड च्वंगु दः । बहुमत दःम्हा सरकार व पार्टी दै दक्व शक्ति देश व जनताया भिं जुइगु ज्या खय् छ्यलय् मःगु इलय् फुक्क जनताता ‘लकडाउन’ निषेधाज्ञाया नामय् लां लां छँ सं कुड तयो नेतात पदीय भागवण्डा खय् जक ल्वापु थयो लयतायो च्वंगु दः । थजगु जक गैरजिम्मेवारी ज्या न्ह्याब्लें न्ह्याब्लें याड च्वनि बलय् देशया कन्हेया ख्वःपा गथे जुई । देया गति छु जुई ? प्रचण्डं कान्तिपुरया सुधीर शर्मा कःगु छगु अन्तर्वार्ताखय् धःगु दः- ‘मसाल पार्टी’ विघटन याड एकता केन्द्र दय्का, एकता केन्द्र विघटन याड माओवादी दय्का, माओवादी व एमालेता नं विघटन याड नेकपा दय्का ।” उकिं लिपा शर्मा छगु न्ह्यसः ताड न्यनः - अःपः नेकपाया खः ला ? प्रचण्डं अः पुक हे धाला - खः अः पः नेकपा याय्गु हे खः । माओवादी व एमाले एकीकरण जूगु थ्यं मथ्यं नेदाया दुनय् व खौं काथं ज्या याड क्यना । वयकलं नेपःबल्लाकेगु व समृद्ध याय्गु मखु देता कमजोर व भारतकय् बः कायो च्वनय् माय्क तय्गु मति काथं ज्या साड च्वनि । वं ताकयलासा पार्टी जक मखु छुं दिनय् देश हे मेपिनिगु लाहातय् लः ल्हाड सिक्किम यात धःसा अजु चाय् मालिमखु ।

नेकपाया ल्वापु ओली व प्रचण्डनपां जक स्वाड च्वंगु मखु । देया सार्वभौमिकता, स्वतन्त्र अस्तित्व व शान्ति सुरक्षा नपां नं स्वाड च्वंगु खः । सरकारया न्ह्यलुवां देया काथं मछिनिगु स्थितिं थाकायो यंकेता न्ह्याथिन्योगु पंगः त नं चिइक वानय्गुकुत याय्मः । तयार जुयमः । केपी ओलीं थःगु दलया बहुमत दयकं दयकं सरकारता ज्या सांकय् मविइम्हा प्रचण्ड-नेपाल गुट नपां आत्मसमर्पण याय्गु स्वयो ताजा जनादेशया नितिं संसद विघटन यागु पलायाता बांलागु व स्वाभाविक पला धाय् मः । थःगु दलया सांसद पिंता कजय (नियन्त्रण) याय्ता बहुमत दःम्हा प्रधानमन्त्री संसद विघटनया अधिकार कायो तःगु दै । निर्वाचन छगू प्रजातान्त्रिक प्रक्रिया नं खः । न्यायालयं न्ह्याथिन्योगु निर्णय ब्यूसां नं ताजा जनादेश छगू प्रजातान्त्रिक प्रक्रिया जूगुलिं निर्वाचने वानय्ता छुं नं दल त लिपालाक च्वनय मज्यू । निर्वाचननपां ग्याइपुं लोकतान्त्रिक जुय फैंमखु । अथेजूगुलिं निर्वाचनय् वानय्गु तयारी हे थौं या आवश्यकता खः ।

स्वप नगरपालिकाता न्ह्याब्लें

सफा, सुगुधर तय्गु सकल

नगरवासीतय्गु कर्तव्य खः ।



इयस्वंगुगु स्वप पौ, बःछि पौ(पाक्षिक)

द्यो चाकु सङ्क्रान्ति

● आशाकुमार चिकंभञ्जार

नेवः संस्कारय् दुनय् अनेक नखा चखात दःगु खाँ धायो चवनय् मालि मखु । फुक्कसिनं स्यूगु हे खाँ खः । संस्कार व संस्कृति मरुपुं मानव सायद दैमखु । मानव सभ्यताया विकास नपां मनूया दिमागं ज्यू मज्यूया अमूइ लाड संस्कार व संस्कृति दय्कः पूखां त्वः त तकगु खः । वहे पुखां क्यंगु लॉपु ज्वड फःसां नखा डाय्क चवन, मफूसां नखा डाय्क चवन । अथेनं संस्कृतिया दुनय् दुवाल स्वयगु ज्या उलिसिनं याड च्वंगु खानय् मरु । थः पुखां याड वांगु ज्याया गथे खः अथेहे याड डाय्कय् मफै धाय्गु मतिं चान्हिं मधसें, थाकु अःपु मधसिं, दःमरु मधःसिं ज्या साड च्वनि । वहे हिचःतिया फल नखा-चखा बलय् खर्च याड च्वनि । दःसा दःथे मखुसा त्याड जूसा नखा-चखा मानेयाइ । मरुसा त्याड जूसा नखा डाय्केगु त्वः मतसिं वयो च्वना नेवः जाति तय्सं ।

मौसम काथं पला छियगुलि मनू तयूता स्यनय म्वँ । पशुपन्थी हे मौसमकाथं थाय् हिलः जुय सः सा मनूयां भन जुइगु स्वाभाविक हे जुल । नखा चखा बलय् नइगु नसा थुकिया छगू दसु खः । श्वहे दसुकाथं माघ महिनाया सङ्क्रान्ति अथे धाय्गु माघ १ गते या द्यो चाकु सङ्क्रान्ति नं छगु खः । श्वइलय् सुजद्यो मकर राशी खय् वानिगुलिं थुकियाता मकर सङ्क्रान्ति नं धाई ।

चिकुलाय् अपलं पू गाइगु व चिकुइगु थुगु इलय् माघ ज्वःछि तिर्थय् वाड म्वँ ल्हूयगु याय्मः धाई । लच्छी यंक तिर्थय वाड फःसा म्वँ ल्हूयगु जक मखु सिलामं तुलिपुं, जलसं च्वनिपुं तक नं दः । थजगु ज्या माघया सङ्क्रान्तिं निसें सुरु याई । श्व दिनसं द्यो चाकु तयो व नपां तरु, काचिगु माःगु लाभा वाल नय्गु याई । अलय् थथे द्योचाकु कला याय् धुक जानयो म्वँ ल्हूयो थः मांया लाहातं कपालय् चिकं तय्गु याई । धात्थे उब्ले म्वँ ल्हूयगु थाकु चाइगु इलय् संस्कृतिया नामय् म्वँ मलहूसें मगाक, अलय् चिकं तकः थः मां पाखं आशिर्वाद काय्गु काथं थुगु चलन याड तःगु जुयमः ।

न्ह्याथय् थजु माघे सङ्क्रान्ति मकर सङ्क्रान्ति धःसां थुगु इलय् नैगु नसा ज्वलंया खाँ न्हिथाड उकि दुनय् दुवालः स्वय फःसा थुगु नखाया महत्व भन स्पष्ट जुइगु खै ।

द्योः

थुगु इलय् साँ दुर्याय् द्यो मखु, मँ दुर्याय्गु द्यो काचिकं नइगु खः । द्यो छगू तागतया बस्तु खः । चिकुलाया इलय् ख्वाउँयो च्वंगु जिउ क्वाकय्ता थुकी ग्वाहाली याई । जिवय् तागत वयकेता नैगु बस्तुमध्येया नेपः मिया थःगु देया उत्पादन द्यो थुगु नखा खय् मदय्क मगागु काथं कायो तःगु या कारण थथे हे जुयमः ।

चाकुः

चाकु नं जिवयता क्वाकः तागत बिइगु बस्तु खः । नेपः या थी थी थासय् छगू छगू विशेषताया नसा दः थें चाकु धःसा टोखाया चाकु बांला धाई । ख्वपया जुजु धौ, थें टोखाया चाकु बांला धःसां फुक्क थासय् टोखाया चाकु थयंकय् फै मखु । उकिं मेमेगु थासय् नं चाकु ह्यो मियगु याई । चाकु मध्ये बांलागु चाकुया नां धःसा खुलु चाकु खः जक धाई । मचा बुइबलय् मचाबूम्हा सीता नकिगु चाकु नं जूगुलिं थुकियाता पोषक तत्व काथं कायो तःगु सियदः । उकिं थुगु नखा बलय् नं चाकु नय्गु याड तःगु खः ।



तरुः

तरु कन्दमूल जातया तरकारी खः । थौं कन्हेया मिखालं स्वयगु खःसा छुं नं विषादी मरुगु, चिल्लो मरुगु छगू वन कन्दमूल काथं काय् फः । भोकमरी उलि तामपाय्म धाय्गु स्यूपुं भी पुखांपिसं थःगु थासय्या उत्पादन अलय् अपसिया मिखा मवांगु कन्दमूलनं नसा खय् दुश्याकय् हःगु तस्कं बुद्धिमानिया खाँ खः । धाई थौं कन्हेया ल्यासे ल्याम्होपिसं पित्यासा चाउचाउहे नय्मः प्याचःसा कोक हे त्वनय्मः पिन्ता श्व छगू शिक्षा खः । भीगु थासय् भण्डै सिंतिं वानय् तांगु चा दुनय् सुचुक च्वंगु तरुता लिकायो माड तरकारी दयक नय्गु स्यड तकगु अलय् नखा बलय्निसें सुरु याड तकगु छगु तहांगु ज्ञान खः ।



लाभाः

लाभा नं चिकुलाया इलय् जक मखु न्ह्याब्लें जिवयता निंगु छगु खाद्य खः । उकि मध्ये घ्यो चाकु सङ्क्रान्ति बलय् लाभा मा नय् जिङ्गु काथं तः माई । काची लाभां जिउ क्वाकः विङ्गु नं जुल नपां जिवयता मःगु पौष्टिक नं दङ्गु खौं नं थौया विशेषज्ञ पिसं धायो च्वंगु जुल । थुब्ले निसें काची लाभाया घासा भव्य बलय नं छुङ्गु सुरु याई ।

कःच ब्वःजा

कः हवल कः मा बुयो वङ्गु थुगु इलय् कःच कताड जा थुयो जाखय् तयो ब्वःजा याड नैगु चलन कःबा ताड वांसेलिं बुलुहें ताड वान । वांगु कँया महत्व थें वांगु कःचः याय् नं जरुर भिगु लक्षण दै । श्वनं अनुसन्धानया विषय खः । नेव समाजय् काचिकं ख्वखः, तुक्चा लाभा, प्याज, लैं, गाजर, माकुजिसा नःथें कः चः



नं नैगु चलन दः । अथेहे कःचः तरकारी नं नय्गु या । उखुनुं कःचः नःसा दाछी तक सांगु नः सां बिगार याय् फैमखु जक विश्वास याई । मस्तबलय् बुई वाड त्वा हे वाउंसे च्वंक कःच कताड नय्गु अः थें लुमांसे व ।

श्वनपां आलु, काउलीया तरकारी नं घ्यो चाकु कला याडबलय् नय्गु याई । गुम्हांगुम्हासिया उखुनुं साख्ला नं नय्गु या । थुखुनुं ख्वपयया तिल माधव नारांछो याथाय् साँयाता हाम्ब छ्वः तयो साँ छ्व नकिगु नं चलन दः । दाछीया छक नेव तय् लक्ष्मी पुजा बलय् साँयाता पुजा मयासैं घ्यो चाकु सङ्क्रान्तिबलय् नाननि (नारायण चोके) साँयाता पुजा याड साँछ्व नकेगु याड तःगु दः ।

नेवः संस्कारया संस्कृति छगू हलिमय ज्वः मरुगु संस्कृति जुल । संस्कृतिया खचाय् तयो लुयो हैगु संस्कार अझ च्वन्ह्यागु खः हे खतः । वनपां वङ्गु नसा त्वँसा ब्वसेलागु जक मखु स्वास्थयया नितिं हे उलि हे निंगु खौं विज्ञान सम्मत काथं कायो च्वंगु दः । मात्र

इयस्तंगूगु स्वप पौ. बःछि पौ(पाक्षिक)

थुकि दुनय् अध्ययन-अनुसन्धान याड लिचवः पिकाय्गु जिम्मा थौया पुस्ताता बियो तःगु काथं काय्मः ।

नेवः संस्कृति ऋतुकाथं म्यँ हालः ऋतु अनुसारया नसा अलय् वस पुनय्गु नं याई । गथेकि चैत्र बैशाख घातु हाल बिस्का नखा मानय याई । अलय् कः छँ ब्वजा नपां थी थी घासा तयो भ्वँ नई । न्हँगु नं फियो चुपिंगालय् ख्वः स्यू वानि । ल्यसिं थांगु स्वयो ल्याहाँ दै । ल्यसिं क्वथयो, छो स्वगं बियो जात्रा क्वचाय्कि ।

अथेहे जेष्ठ महिनाय् सितिनखा बलय् व चतामारी नयो न्हँगुछ्वः दुकायो छुस्या सियो सतु दय्क नवदुर्गाता म्हँछ्यामारी छायो नुवागी काथं नै । थुब्ले बुँपाज्या म्यँ हाली । अः थुगु चलन तड वान ।

अथेहे असारं सिन्हाज्या म्यँ हालः असारया हिंडान्ह (१५गते) पला लप्ते तयो धौबजी नै । असारया वापिज्या सिधय्क श्रावण महिनाय् सिन्हाज्या ब्यंकः गाथामगः वाय् यंकः भ्वँ नै । भाद्र बलय् यन्या पुन्ही बलय् पुलुकिसी स्वयो, इन्द्र जात्रा याड थी थी सांस्कृतिक प्याखं पिदानी । अथेहे गुन्हीपुन्ही व सापारु बलय् घिन्ताडगिसी ल्हूयो क्वाति त्वडः साँचा नपां हिसी ख्याली याड दे चाहिलि ।

अलय् असोजया मोहनी बलय् मालश्री हालः दुगु, खा, मँ, हायँ स्याड भ्वे नै । अलय् कार्तिकं किजापुजा, म्हापुजा, याड वहेकाथं म्यँ हालः मुटुमारी नपांया भ्वँ नै । मंसिरं सकिमा पुन्ही बलय् सकिमाड नै सा पुसय् बहँगु वा या योमारी छुड योमारी पुजा याड भ्वँ नै । माघं घ्यो चाकु सङ्क्रान्ति सं घ्यो चाकु तयो कला याड । फागुनं होली पुन्हीया रस सङ्ग नपां श्रीपञ्चमी निसें सुरु यागु बसन्त हाहां होली बलय् होलीया म्यँ हाल भ्वँ नै । श व हे काथं दाछी तक नेवः संस्कार व संस्कृति न्ह्याड च्वनि ।

गुब्लें सुर्य नपां गुब्लें तिमिला नपां गुब्लें सिमाचुली नपां, गुब्लें व फय् नपां नखा चखा वई । मन चं चं धाय्क थः कय् दःगु ब्राजा गाजा नपां प्याखं ख्वायँ कायो नखा चखा मानय् याइ । गुगु नखा चखा घ्यो चाकु थें हे साई ।

अथेहे फुक्क नेवः तयगु नखा चखा या नसा ज्वलं व संस्कार धःसा उः मला । स्वनिगः या यँ - यल-ख्वपया चलन नं पाः । उकि दुनय, स्थानीयताया पहः किड च्वंगु दै । यलय् घ्यो-चाकु मकलय् होम याड नै सा यँ घ्यो चाकु नपां मार्यँ व डा तयो कला याई । उखुनु नःम्हा डाय्या कपः न्हिय फःसा शत्रुया कपः न्हियागु थें जुइ दक यमि तय्सं धायो च्वंगु दः ।


अथेनं माघ १ गते हे नेवः समाजय् माघ सुरु जुगु धःसा माने याइ मखु पुन्ही निसें माघ सुरु जूगु व स्वस्थानी या बाखं नपां माघ धलं दानेगु सुरु याइसा पुन्ही बलय् हे क्वचाय्की । थुकिं माघ १ माघ महातरम्य नपां बिस्कं खः जक धाय्फः ।

सन् २०२० याता लिफः स्वया बलय्

(थी थी देया न्हँदँ डाय्किगु व उगु दाच्छिया दुनय् छु छु बाँलागु ज्या जुला ? छु छु बांमलागु ज्या जुला दक लिपुल स्वइगु चलन दः । नकतिनि ई.सं. २०२० याता विदा बियो २०२१ याता लसकुस याता । सन २०२० दुनय् छु छु जुला दक दुवाल स्वय्गु इवलय् मजदुर न्हिपौसं पिब्वगु जीवन भण्डारी जुया च्वसुया भाय हिलागु जुल-सं)

अंग्रेजी न्हँ दँ सन २०२० मे मेगु दायँ स्वयो छगू तस्कं पाकः नपां तस्कं पीडा, दुःखं जाय्क बितः । थुगु दायँ हलिमय फुक्क मन्त नुगलय्या नारांघो हे ग्याकः, ठप्प जुइकः ताः ई तक मतिमतथें अपलं अपः मन्तय्गु कोरोना भव्लवचं उथि उथि कांकः थः छँ जः पुं मदय्क च्वनय् मःपुं अपलं मन्तय्गु लागिं लुमांकां लुमांकय् मफैगु लुमन्तिया दाँ काथं बितय् याय् मगु दाँ जुयोबिल । सन २०२० कयं थें मकयंथें च्वंगु इलय् निसें हलिमय खानय् दःगु कोरोना भव्लवय फय्थें डाड फुक्क लागाय् तप्यंक मारय् लाकः बिलसा दाच्छी तक कोरोनाया चक्रब्यूह खय् लाड च्वन । अजगु कोरोना महामारीया दश्वी नं थुगुसी अपलं महत्वपूर्ण घटनात जगु दः । गुकिया बः चा हाकलं मुख्य मुख्यगु घटनात न्हिथाड च्वडा :

कोरोना महामारी



थुगुसीया दकलय् तः हांगु नुगः द्यो हे ग्याकः प्याहाँ वगु घटना धाय्गु हे कोरोना भव्लवय हे खः । श्व थुगुसीया जक मखु थुगु युगयाय् हे तस्कं तः हांगु रुप कःगू घटना काथं कायो च्वंगु दः । कोरोना ल्वचं सर्वब्यापी व सर्वपक्षीय क्षति जगुयां ल्या चा हे मरु । अथेनं मानवीय व आर्थिक नोक्सानया जक अपलं खाँ प्याहाँ वला । कोरोना ल्वचं अः तक खय् हलिमयया १८ लाख १३ हजार स्वयो अपः मन्त सीय धुंकलसा ८३ करोड १३ लाख स्वयो अपलं मन्त ल्वचं कयो उथिउथि कांकः संक्रमित यात । आर्थिक क्षति गुलि जुला दक अः तक नं विश्वास याय् फँगु काथंया ल्याचा पिथानय् मफूनि । महामारी जुयो च्वंगु इलय् वांगु नोभेम्बर ८ तारेख निसें कोरोना ल्वयया खोप प्याहाँ वयो खोप याकिगु नं यात । फाइजर

व बायोएनटेकं विकास यागु खोप छ्यलय् धुंकलसा मेमेगु खोपत नं छ्यलय् फँगु काथं अन्तिम चरणय् थ्यंगुलिं महामारी म्हवँ जु जुं वानिगु आशा यायां सन २०२० ता बिदाइ यात ।

ईयूपाखं बेलायत प्याहाँ वल (बहिर्गमन)

ताः ई तक बिवाद यासे, थः दखय् लुतुलुयो साँ साँ आखिरय् यूरोपेली संघ पाखं बेलायत प्याहाँ वल । जनवरी ३१ सय् बेलायत यूरोपेली संघं प्याहाँ वय्गु प्रक्रिया अन्यौलय् लाड च्वंगु खः । यूरोपेली संघं प्याहाँ वसेलिं अः ब्यापार, सुरक्षा, यातायात नपांया लागाय् बेलायत न्हँगु स्वापुया लागिं सम्भौता याय्गु प्रक्रिया न्ह्याक च्वंगु दः ।

ट्रम्पमय राजनीति

अमेरिकी राष्ट्रपति डोनाल्ड ट्रम्प थःगु कार्यकालया न्हापांगु इलय् निसें चर्चाखय् दःसां थुगुसी कार्यकाल नवीकरण याय्गु दाँ जुगुलिं नं अपलं बय बय जुल । वांगु नोभेम्बर ३ य् जगु निर्वाचनं थःगु कार्यकाल ताः हाकय् मफूयो चबुसां वयकलं निर्वाचनया इलय् यागु आरोप-प्रत्यारोप, मास्क मतय्गु (बहिस्कार), कोरोना भव्लवयया विषय वयकया बिचः (दृष्टिकोण), नपांया हुनिं वयक चर्चाया केन्द्रय लाड हे च्वना । नेकगु कार्यकाल चलेयाय् मखांम्हा दुर्लभ राष्ट्रपतिकथं वयकता थुगुसी खाँ ज्या क्वः छिड बिल । वयकता बुकः डेमोक्रेटिक उम्मेदवार जो बाइडेन निर्वाचनं त्याकः वल । निर्वाचन लिपा नं वयकलं चुनाबलय् भेला जुला दक लिचवः अस्वीकार याड तातु ताड बयबय याकेगु ज्या खाँ याड दिल । वर्षया सुरुवाति फेब्रुअरी ६ तारिख खुनुं तल्लो सदनय् पारित ट्रम्प विरुद्धया महाभियोग प्रस्ताव (माथिल्लो सदन) सिनेटं खारेज यात ।

अफगानिस्तानं अमेरिकी सैनिक लिताकाल

अमेरिकां तालिवान नपां सम्भौता याड अफगानिस्तानं थःपुं अमेरिकी सैनिक लिता काल । सन २०१६ खय् राष्ट्रपति त्याक वांसेलीं डोनाल्ड ट्रम्पं अफगानिस्तानय् अमेरिकी सेना मतय्गु घोषणा यागु खः । गुगु घोषणा वयकया कार्यकालय् दकलय् लीपा तिनी लागु जुला । तालिवान विद्रोही व अमेरिकाया दश्वी अफगानिस्तानय् हिंच्यादा स्वयो अपः दाँ तक युद्ध जुयो च्वंगु खःसा अः म्हवँ जुजुं वांगु धायो च्वंगु दः । अथेनं शान्ति प्रक्रिया धःसा अः तक नं तार्किक निष्कर्षय् थ्यंगु मरुनि ।

सूबुइँचा (सलह) आतड्क



थुगुसीया हलिमय डांकः बय बय जुगु घटना मध्ये (क्व) सू बुइँचा आतड्क नं छगू खः । विशेष याडः दक्षिण एशियाया देशय् थुकिया अपलं बय बय जुल । कोरोनाया महामारी जुयो च्वंगु इलय् सूबुइँचा नं पाडां पानय मफयक डाड वाड च्वंगु खाड खाद्य सड्कट वयो पित्याड वाथा वाथा कानिगु खःला दक अपलं मनूतयसं विश्लेषण नं यागु खः । सन २०१९ या सुरुवाति महिनाय् दकलय् न्हैःपां यमनय खानय दःपुं सु बुइँचात हे दाच्छी लिपा साउदी अरब, इरान जुजुं दक्षिण एशियाली राष्ट्र पाकिस्तानय खानय दःगु खः । उकिं लिपा पाकिस्तानय अपलं नोक्सान याडालिं बुलुहुँ भारत जुजुं नेपालय द्रुहँवगु खः । गुकिं थुगु देया बुँया बाली अपलं नोक्सान याता ।

तःतः ह्रांगु दुःखद घटना

थुगुसीया तः ह्रांगु घटना मध्ये इराकया राजधानी बगदादय अमेरिकी हवाइ हमलाखं इरानी उच्च सैन्य कमाण्डर कासिम सुलेमानीया हत्याखं हलिमय् डांकः लबु थाड बिला । जनवरी ३ खय् जूगु थुगु घटनाया चर्चा खवंयमलाबलय् इरानया सेनां युक्तेनी विमानता क्वफ्वाड बिला । इरानया सेनां लिपा 'मानवीय त्रुतिया

इयस्तंगूगु स्वप पौ बःछि पौ(पाक्षिक)

कारण' विमान क्वफ्वागु खाँ स्वीकार यागु खः । दुर्घटनाखय् विमानय् च्वड वापुं फुक्क हे सीगु खः । विशेष इरान व युक्तेन नपां थी थी देशयायपुं याड सच्छि व न्हय्खुम्हा नागरिकपिनिगु उगु घटनाय् प्राण वांगु खः । लेवनानया राजधानी बेरुतय् जूगु शक्तिशाली विस्फोटय् लाडः थयं मथयं चयम्हासिया प्राण काल । अष्ट्रेलियाय् गुँ मिन्वः थाय् अपलं अपः जीव जन्तु तयगु ज्यान वान । मिस्रयाय्मफयो वाथा वाथा हे कांगु खः । मिन्वः गुया असर मेमेगु देशय् नं लात । हलिमय बय बय जूगु घटना मध्ये अमेरिकाय् छम्हा अफ्रिकी अमेरिकीप्रहरी स्यागुया विरोधय् रड्ग भेद आन्दोलनं अमेरिकाय् भवखाहे बवल ।

अलबिदा म्यारोडोना

भतिंगवारा (फुटबल) या लागाय् फुक्कसिया नुगलय् माया याड तयो तःम्हा महान कासामि डिएगो म्यारोडोना थुगुसी भी पाखं कालं लाकः यंकल । वयकलं १९८६ या विश्वकपया उपाधि अर्जेन्टिनाय् त्याकः हयो ब्यूगु खः । सन २००० खय् फिफां मतदान याक बलय् अर्जेन्टिनाया फुटबल हस्ती म्यारोडोना शताब्दीया दकलय् चवय्या सर्वोकृष्ट कासामि काथं ल्य ज्या यागु खः । कासाख्यलय् गुलिसिनं वयकता फुटबलमयी खेलाडी व 'द्यो' थें हे मानेयाड च्वंगु खानय् दः । ६० दाय् इलय् म्यारोडोना मरुगु खाँ न्यनय् वं हलिमयया लाखाँ मनूत तस्कं नुगः मुडकः दुःख ताय्क च्वंगु जुल । वयक मरुबलय् अर्जेन्टिनां स्वन्हु राष्ट्रिय शोक घोषणा यागु खः ।

चवय न्हिथाडागु बाहेकं नं सन २०२० या इलय् विश्वय् मेमे पुं नं तस्कं प्रभावशाली व लुमांकय् बहपुं मनूत मदयक चवनय् मःगु दः । अथेहे मेमेगु नं अपलं लिपा थयंक महन्व तैगु घटनात नं जूगु दः । अपलं कोरोना महामारीया दथ्वी नं निर्वाचन याड न्हूंगु सरकार निस्वांगु दःसा राजनीतिक समीकरण व सीमा विवादया इलय् ब्यलय् बय् बय् जूगु दः ।

-रासस

इनाप

खवप नगरपालिका पाखं पिथाड च्वंगु स्वप पौ बः छि पौ खय् बांलागु चवसु त बियो ग्वाहाली याड दिसँ । उगु रचनाया ल्यः ज्या याड पारिश्रमिक बियगु खाँ खवप नगरपालिकाया २०७७ श्रावण २६ गते च्वंगु बैठकं

क्वः छ्यूगु खाँ ब्याक चवडा ।

सम्पादक
खवप पौ

स्वप नगरपालिकाया ज्या भवः त

शारदा मा.वि या न्हूगु भवन निःस्वान

१३ पुस

राणा व पञ्च तय्गु पालाय् नं तः तः जःगु भवन त दय्कला , लौं दय्कला अलय् फुक्कथासय् उथिग्यंकः विकास मयागुलि जनतां दुःख सिला । भीगु देशय् बहुदल वगु स्वीदा मयाकं दय धुकल । अथे नं जनताया अवस्था न्हिया न्हिथं क्वम्हूयो वाड च्वंगु दः । जनतात गरिबीया गालं थाहाँ वय मफः । उथिग्यंकःफुक्क थासय् विकास याय्मः धाय्गु खाँ थुइकय् मफयो दे या अवस्था भन भन ग्यापुसे च्वंक क्वहँ वाड च्वंगु दः । शासक दलं विकासया नामयँ राज्यकोषता थःगु हे दुकुटी थें छ्यलः थः गुया नितिजक छ्यलः दुरुपयोग याड च्वंगुलिं देया अर्थतन्त्र भन भन गालय् दुडु वाड च्वंगु दः । थुगु खाँ शारदा मा.वि. या भवन निःस्वानय्गु इवलय् स्कूलया हःनयँ ग्वसः ग्वयो न्ह्याकगु भेला सं नेपाल मजदुर किसान पार्टीया छ्याञ्जे प्रेम सुवालं धायो द्यगु खः ।



वयकलं जनताया सांस्कृतिक स्तर थाकाय् मफू तलय् तः तः खागु भवन व लौजक दय्क विकास जुला दक धाय् फँ मखु । थव विकास नापे याय्गु दापु मखु धायो दिसे लिपा छु जुइ धाय्गु दुरदर्शिता मदय्क यागु अव्यवस्थित प्लटिडं भीगु सभ्यताय् बाँमलागु लिच्च लाड च्वंगु खाँ ब्याक दिल । नपां वयकलं अपलं वर्ष सत्ताया चाकलिं जक च्वड दे व जनताया नितिं ब्वसेलागु स्यल्लागु छुं हे ज्या मयासँ च्वंपु शासक दलया नेता तय्सं ख्वपय् विकास मजु धाय्गु विकासया अवधारणाया भ्या-भाति हे खाँ मथुगुया दसी खः, ठेक्कापट्टाखय् लय्तायो जुइपुं अलय् छ्वाय् नय्गु पल्के थूपिसं उथिग्यंक विकास याय्गु स्वइमखु दक धायो दिल ।

वयकलं देया फुक्क थासय् विकास याय्गु खःसा शिक्षा व स्वास्थ्य निःशुल्क याय्मः धाय्गु नेमकिपाया खाँ मन्यनिगु अलय् विकासया आधारभूत खाँत निजीकरण याय्गु २०४६

साल लिपाया शासक पिसं थौं गरिब अलय् आर्थिक रुपं लिनय् लाड च्वंगु समुदायता शिक्षा काय् मफैगु काथंया ज्या याड च्वंगु बिचः प्वंकसे संसदीय ब्यवस्थाखय् प्रधानमन्त्रीकय् गोलीं जःगु बन्दुक दैगुलिं थौं वहे बन्दुकया लिधांसाय् संसद विघटन याडः ताजा जनादेशया नितिं मध्यावधि निर्वाचनयाय्गु आह्वान यागु सकारात्मक खः धायो दिल ।

मू पाहाँ सुवाल जुं चांकाकः अपां दाड तःगु छँ नं भूकम्प प्रतिरोधात्मक जुइगु चर्चा यासे सभ्यता म्वाकः तय्गुलि सरकारं पला छियम धायोदिल ।

नेपाल मजदुर किसान पार्टीया केन्द्रीय दुजः नपां बागमती प्रदेश सांसद सुरेन्द्र राज गोसाईं जुं देया तः तः ह्रांगु पार्टी धःपुं व उकिया नेतात दलीय भागवण्डाखय् जक ध्यानतयो जूगुलिं देशय् थौंया स्थिति वगु खाँ काड दिल । वयकलं २१ औं शताब्दीया शिक्षक पिन्के थौंया युगयाता ल्वय्कः दक्षता व सीप दय्क जुयता प्रेरित याय्मःगु खाँ खय् बःबिसे सामूहिक हितया लागिं सामूहिक मेहनत व गतिशील प्रशासन मः धायो दिल ।

ख्वप नगरपालिकाया उप प्रमुख रजनी जोशी जुं ख्वप नगरपालिकां सामूदायिक ब्वनय् कुथिता हज्याड यंकय् गुलि योजना दय्क हज्याड च्वंगु खाँ ब्याकसे सरकारं भूकम्प प्रतिरोधी भवन थथे जुयमः दक नीतिगत ढाँचा दय्क वियमःगुलि अथे याड च्वंगु मरुगु नपां पुरातात्विक व पुलांगु प्राचीन भवनया महत्व मथुगु खाँ ब्याक दिल । नपां वयकलं सम्पदा म्वाकः तय्ता मे पिंकय् लाहा फयो काय्गु मस्वसें भी अग्रज पिनिगु म्हागस व सम्पदाप्रतिया चाहनाता बिचः याड ख्वप नगरपालिका हज्याड च्वंगु खाँ ब्याक दिल ।

ख्वप नगरपालिका वडा नं. २ या वडाध्यक्ष हरिप्रसाद बासुकलाजुं ब्वनय्कुथिया भवनत भीगु हे मौलिक पहलं दय्कगु बांलागु पक्ष खः धायोदिसे शिक्षाया नितिं ख्वप नगरपालिकां ब्वसेलागु ज्या साड च्वंगु खाँ ब्याक दिल ।

सभानायो विद्यालय ब्यवस्थापन समितिया नायो राजेन्द्र हाडाजुं अः दानय्तांगु भवन नेदाया दुनयँ क्वचाय्केगु लक्ष्य दःगु नपां भवन परम्परागत शैलीं दानिगु नं खाँ ब्याक दिल ।

ब्वनय्कुथिया पुलांम्हा (भू.पु) शिक्षक प्रेम गोपाल कर्माचार्य, प्र.अ. रोशन राज तुइतुइ, शिक्षक सुन्दर राजचलपिसं न्वचु तयो द्यगु उगु सभासं भवन दय्केता थःगु पाखं छगू लाख तका दां ग्वाहाली याय्गु खाँ प्रेम गोपाल कर्माचार्य जुं प्रतिबद्धता प्वंक दिल ।

वागीश्वरी मा. वि. या न्हूंगु भवन निस्वान

पुस १३

ख्वप नगरपालिका प्रमुख सुनिल प्रजापति जुं ख्वप नगरपालिका वडा नं. ९ च्याम्हासिंगल्य् च्वंगु वागीश्वरी मा.वि. या न्हूंगु भवन निःस्वाड दिल ।

भवन निस्वानय्गु इवल्य् प्रमुख प्रजापति जुं वागीश्वरी मा.वि. ज्यासाड दीपुं शिक्षकपुं अभिभावकपुं व स्थानीय जनताया मंकःकुतलं विद्यालयया प्रगतिसम्भव जूगु खः धायोदिसे अः दानय तांगु न्हूंगु भवन बल्लाक बांलाक भिंक इलय् हे सिधय्किगु विश्वास प्वंक दिल ।



वयकलं शिक्षकपिनिगु ब्यक्तिगत स्वार्थता हःनय तयो ज्यासांसा विद्यालय हज्याय मफैगु खौं ब्याकसे वागीश्वरी मा.वि. देशयानिति मःपुं दक्ष, योग्य जनशक्ति ब्वलांकः च्वंगु खौं ब्याकसे श्वनं लिपाया दिनय् नं गुणस्तरीय शिक्षा-बियो अभनं बांलाक यंक्य् मः जक धायोदिल ।

विश्वसम्पदा या धलःख्य् नां जायो च्वंगु ख्वपया लाय्कुली

जःखःया स्वंगू ब्वनय्कुथिता नं भीगु थःगु पुलांगु मौलिक पहलं परम्परागत शैलीख्य् दानय्ता ख्वप नगरपालिकां बः बियो वयो च्व.गु खौं ब्याकसे वयकलं देया फुक्क सम्पदा भीगु हे सम्पदा खः धायोदिल ।

२०७२ सालया तः भ्वखाचां स्यंकः थुड ब्यूगु सम्पदात ल्हवनय् -कानय् व दानय्गु ज्या दकलय् हःनय्तयो नगरपालिकां ज्या हज्याड यंकः च्वंगु खौं ब्याकसे प्रमुख प्रजापतिजुं भुकम्प पीडित पिन्ता बिड्गु पुनःनिर्माणया अनुदानया धेबा मचःगुलिं ताड बियमःगुउगु धेबा किस्ता किस्ता मयासें छकलं बिय मःगु व किस्ता काय्गु इ नं ताड बियमःगु खौं ज्वड मदिसे हज्याड हाल च्वडागु खौं नं ब्याक दिल ।

वागीश्वरी मा.वि. ब्यवस्थापन समितिया नायो नपां ख्वप नगरपालिका वडा नं. ९ या वडाध्यक्ष रविन्द्र ज्याख्व जुं वागीश्वरी मा.वि. या भौतिक, प्राज्ञिक व शैक्षिक प्रगतिया नितिं ब्वनय्कुथि मदिक्व हज्याड च्वंगु स्थानीय जनताया थःगु धाय्गु भावनां प्यागु ब्वनय्कुथिया ज्या इवःत जनताता नं काँ कां वानय् मःगु खौं ब्याक दिल ।

वागीश्वरी मा.वि. या पूर्व प्राचार्य नपां विद्यालय ब्यवस्थापन समितिया दुजः मोहन प्रसाद प्रजापति जुं ब्वनय् कुथिं प्राविधिक शिक्षाता बः ब्यू ब्यू न्हूँ न्हूँगु विषयत ताँ तां यंक्य् मःगु, ब्वनय् कुथिया विकास व स्तर वृद्धिया नितिं गुणस्तरीय शिक्षा ब्यू ब्यू यंक्य् मःगु खौं ब्याक दिल ।

ज्या इवःसं विद्यालयया प्र.अ. कृष्ण प्रसाद घन्टा, विद्यालयया कजि ज्ञानसागर प्रजापति, वागीश्वरी भवन रेखदेख समितिया कजि ई. कृष्णनीर छुकां व वागीश्वरी मा.वि. या सहायक प्र.अ. कृष्ण प्रसाद कर्माचार्य जु पिसं नं न्वचु तयो द्यूगु खः ।

बजार अनुगमन

पुस १४

ख्वप नगरपालिका अनुगमन समितिं ख्वपया लान्चा फल्चा निसें यातु महाद्योथाय् तक्या बजार अनुगमन याय्गु इवल्य् हिं च्यागू पसल्य् अनुगमन यात ।

अनुगमन याय्गु इवल्य् दर्ता मयासें चाय्क तःगु जा पसः (भोजनालय) तय्ता दर्ता यो वय्ता अलय् अनुमतिहे मकःसें मादक पदार्थ मियो तः पिन्ता मःगु अनुमति काय्ता निर्देशन नं बिल ।

अथेहे छुं छुं पसलं नवीकरण मयागु नपां म्याद फूगु सामान तयो तःगु नं खानय् दत । अजगु म्याद फुगु सामान

अनुगमन समितिं बरामद याड नष्ट याड बिला । नेगू प्यंगू पसलं ढः, तालाजु नापतौल विभागय् नवीकरण मयागु नं खानय् दतः ।

अनुगमनसं अनुगमन समितिया कजि राजकृष्ण गोराया न्हयलुवाय् वांगु पुचःया दुजः पुं वडाध्यक्ष (६) हरिराम सुवाल, भ.न.पा. श्यानितेशन उपशाखाया निमित्त प्रमुख नपां वडा निरीक्षक रामकृष्ण प्रजापति, कर उपशाखाया मोहन देबी ब्याञ्जू, महानगरीय प्रहरी परिसरया प्रहरी सहायक निरीक्षक राजकुमार दनुवार, भक्तपुर घरेलु तथा साना उद्योगया लक्ष्मी प्रसाद बाटी व घरेलु कार्यालयया सीताराम त्वायनापुं भःगु खः ।

सैनिक महाविद्यालयया ४३ कगु बुदिं

ख्वपया सैनिक आवासीय महाविद्यालयया पीस्वकगु बुदिं नेपाली सेनाया बलाधिकृत रथी प्रभूराम शर्माया मू पाहाँलय् वार्षिकोत्सव २०७७ या लसताय् सिरपा लः ल्हाय्गु ज्या पुस १४ गते जूल ।

ज्या इवःसं नेपाली सेनाया महारथी पूर्ण चन्द्र थापा जुं सैनिक आवासीय महाविद्यालयं नेपःया शैक्षिक क्षेत्रय विशिष्ट स्थान हासिल याय्गुलि सफल विद्यालय जूगु खाँ ब्याकसें ब्वनामिपिसं थमनं सय्कगु ज्ञानता दे व समाजया भिं जुइगु ज्याखय् छ्यलय्गुलि समर्पित जुयो हज्याय्ता आग्रह याड दल ।

वयकलं ब्वनामिपुं समाजय् ह्युपा है पुं संबाहक खः धायोदिसे महाविद्यालयया शैक्षिक उन्नतिया लागिं योगदान याय्ता हज्याय्मः धायो दल ।

ज्या इवःया मू पाहाँ प्रभूराम शर्मा जुं महाविद्यालयं कायो च्वंगु उपलब्धीता सकारात्मक लोपु पाखय् हज्याज्यां वानय् मः गुलि बः ब्यसें सैनिक आवासीय महाविद्यालय नेपः याय् हे उत्कृष्ट महाविद्यालय काथं धस्वाड च्वंगु खाँ ब्याकदिल । ज्याइवःसं मू पाहाँ शर्मा जुं ब्वनय्कुथिया सर्वोत्कृष्ट ब्वनामिपुं नी डादातक सेवा या



पिन्ता दीर्घसेवा पुरस्कार र उत्कृष्ट सेवा पुरस्कार लः ल्हाडः दिलसा ज्या इवःया पाहाँ ख्वप नगरपालिकाया प्रमुख सुनिल प्रजापतिजुं हिंडादा तक मदिक महाविद्यालयसं सेवा याड द्युपुं शिक्षक व कर्मचारीपिन्ता हनाः पौ लः ल्हाड दल ।

ज्या इवःसं महाविद्यालयया सम्पर्क अधिकृत नपां प्रमुख सेनानी अनुपशाह जुं सुभाय देछायो द्युगु खः ।

श्वेत भैरव साकोसया साधारण सभा

नेपाल मजदुर किसान पार्टीया केन्द्रीय दुजः नपां ख्वप नगरपालिकाया प्रमुख सुनिल प्रजापतिया मू पाहाँलय् श्वेत भैरव बचत व ऋण सहकारी संस्थाया हिस्वकगु साधारण सभा पुस १६ गते जुल ।



ज्या इवःसं नगर प्रमुख प्रजापति जुं सहकारी संस्थाया मू उद्देश्य धाय्गु उकिया फुक्क दुजः पिनिगु भिं जुइगु ज्या याय्गु खः धायो दिसं संस्थां थी थी लाहातय् ज्या दैगु तालिमत बियमःगु नपां किसानतय् ग्वाहालीमि काथं हज्याय्मः धायो दल ।

वयकलं पुँजीवादी ब्यवस्थाय् प्रधानमन्त्रीता संसद भङ्ग याय्गु विशेषाधिकार दैगु खाँ ब्याकसें - प्रधानमन्त्रीया विशेषाधिकार

छ्यलः केपी ओलिं संसदभङ्ग यागु संसदीय मूल्य मान्यता काथं पाय्छी जू । नेकपा तज्यागु सिद्धान्तया लिधंसाय् मखुसिं सत्ताप्राप्ति व ब्यक्तिगत स्वार्थ नपां स्वापु दगु खाँ काड दल ।

कोरोना भवलय् मपुकः मडांकः तय्ता ख्वप नगरपालिकां प्रकोप ब्यवस्थापन कोष दय्कगुलि थी थी सहकारी संघ-संस्था पाखं भौतिक व आर्थिक ग्वाहाली याड कोरोनाया विरुद्धया ल्वापुख्य नगरपालिकाता ग्वाहाली यागुलिं अपलं सुभाय् प्वकसे वयकलं ख्वपता देया दकलय् बांलागु नगर दय्केगु मतिं जनप्रतिनिधिपिसं ज्या साड च्वंगु खाँ काड दल ।

ख्वप नगरपालिका वडा नं. ८ या वडाध्यक्ष महेन्द्र खायमली संस्थां उत्पादन जुइगु थासय् (लगानी) लाय् छ्यलय् मःगु खाँ ब्याकसें माफिया तय्सं सहकारीता थःगु लाहातय् लाकय् तांगुलि सचेत जुयमः धायोदिल । भक्तपुर जिल्ला साकोसया नाथो कृष्ण गोविन्द्र लाखा जुं 'एक ब्यक्ति एक सहकारी' अन्तर्राष्ट्रिय सहकारीया मूल्य मान्यताया अखः खः धायोदिल ।

साधारण सभासं दुजः पिनिगु तस्कं चासो तयो सक्रिय जुयमःगु खाँ कांसे वयकलं अपलं दुजःपुं सक्रिय जूसा संस्था हज्याकय् फेगु बिचः प्वकः दल । ज्या इवःसं संस्थाया पूर्व न्वक कृष्ण प्रसाद कोजु, संघया न्वकु जितेन्द्र खायमली, छ्याञ्जे सत्यनारायण गाईजु पिसं संस्थाया स्थापनाया उद्देश्य ब्याक दल ।

न्ह्यकगु नेपाल भाषा मुंज्या जुल

पुस १५

जनसहित्य गोष्ठी केपुया ग्वसालय बुद्धबार न्ह्यकगु नेपालभाषा साहित्यतःमुंज्या जुल । उगु मुंज्या सं नेपाल मजदुर किसान पार्टीया नायो नारायणमान बिजुक्छे जुं संसारया बां बांलागु साहित्यत नेपाल भाषां भाय हिलय् मः धायोदिसे गुकिं मेमेगु भाय्या साहित्यखय् दःगु बां बांलागु खाँत भीसं सय्के सिद्धकय् दैगु अलय् भीगु साहित्यखय् दःगु बां बांलागु खाँ त नं मेगु भायया जनतातयसं थुइकी धायो दिल ।

वयकलं दाच्छीया छक जक साहित्य मुंज्या मयासें इलय् ब्यलय् साहित्य मुंज्या याय्मः धायोदिसे साहित्यिक पैत पिथानयगुलि नं बिचः याय्मः धायोदिल । नपां वयकलं साहित्यिक ज्या इवः खय् न्ह्यंगु पुस्ताता हज्याय्ता घ्वासा ब्यू ब्यू वानय्मः धायो दिल ।

नेपाल मजदुर किसान पार्टीया छ्याञ्जे प्रेम सुवाल जुं समसामयिक राजनीति विषयया चर्चा यासे नेमकिपां प्रधानमन्त्री संसद भंग यागुयाता लसकुस यागु मखुसें बरु संसदीय ब्यवस्थाय् थजगु राजनीतिक अभ्यास स्वाभाविक खः धायोदिल ।

वयकलं पुँजीवादी ब्यवस्थाय् कार्यकारी राष्ट्रपति वा प्रधानमन्त्रीता संसदभंग याय्गु अधिकार दै । अः प्रधानमन्त्री उकिया प्रयोग जक यागु खः । उकिता नेमकिपां स्वाभाविक काथं जक कःगु खः जक धायो दिल । प्रधानमन्त्री थःगु हे दलया नेतातयसं हे ज्या सांकय् मब्यूगु खाँ धायो वयो च्वंगु नपां अजगु इलय् थःकय् दःगु राजनैतिक अधिकार जक छ्यलागु धःगुलि प्रधानमन्त्रीया ज्या औचित्यपूर्ण जुगु सुवाल जुया धापु खः । वयकलं नेकपाया दाहाल व नेपाल पक्ष लाँय संघर्ष यो वयमःगुया मू हुनि अमिगु थःगु हे कारणं खः धायो दिसे प्रधानमन्त्री ज्या लगय् मज्यूहा धाय्गु खःसा इलय् हे अविश्वासया प्रस्ताव हयमः गु खः धायो दिल ।

नेमकिपाया केन्द्रीय दुजः अनुराधा थापामगर जुं राज्यं छुं हे चासोमत सिं, भ्याभातिहे बिचः मयागुलिं नेपया अपलं भाय् व संस्कृति ताड् बांगु नपां जनताता भारतीय विस्तारवाद व अमेरिकी साम्राज्यवादया दुष्वरित्रया आगं प्वल अजगु खाँ थुइकय् बियता जनताता सचेत याइगु मदिक्वक रचनात्मक ज्या याय्ता बः बियो दिल ।

देया सीमा चिं मत्यय्केता व सार्वभौमिकता म्वाकः ल्यंकः तय्ता साहित्यिक व राजनीतिक आन्दोलनता न्ह्याकतुं तय्मः धायोदिसे थापामगर जुं कोरोना भ्वल्वयया कहर दशवी जनतात ल्वचं स्वयो पित्यां अपलं सीइ धाय्गु पीर जूगु खाँ ब्याक दिल ।

नेमकिपाया केन्द्रीय दुज नपां बागमती प्रदेशया सांसद सृजना सैजु जुं विश्व सर्वहारावर्गया महान गुरु चिनियाँ क्रान्तिया नेता माओत्सेतुङ्गता लुमांकसें वयकलं हछ्यागु चिनियाँ नयाँ जनवादी क्रान्तिया जगय् चीनया समृद्धि व भब्यता सम्भव जूगु खः धायोदिल । चिनियाँ क्रान्ति लिपा चिनियाँ न्ह्यलुवां फुक्क न्ह्यंगु पुस्ताता मार्क्सवाद-लेनिनवाद व माओत्सेतुङ्ग विचार धारां शिक्षित याय्गु अभिभारा प् वांकेगु बिचः प्वंक दिल ।

वरिष्ठ ई. राजदास श्रेयठजुं नेपःया विकास याय्ता आपासिकं थाकु मज्यूगु खाँ ब्याकसे अथेनं सरकारय् वांगु पार्टीयाय्पिसं भिं याय्गु मस्वसें कुमति तयो ज्या साड् च्वंगुलि देश बर्बाद जूगु खाँ ब्याक दिल । वयकलं कृषि खनिजया विकासय् सरकारं अपलं ग्वाहाली याय मःगु खाँ ब्याकसें देया विकासया लागिं मः काथंया बजेट विनियोजन याय्मःगु खाँ काड् दिल ।

अथेहे वयकलं २०४६ सालया जनआन्दोलनया खाँ लुमांकसे ख्वपय् पञ्चतयसं गोलीं कय्क खुम्हा मनु स्याडानं येँ दे व यल देया जनतात मदांगुलि चिन्ता प्वंकसे जनकवि दुर्गालाल श्रेष्ठ (भक्तपुरमा गोली चल्दा पनि काठमाडौं बासी किन उठेन) ख्वपय् गोली चलय् जुयानं येँ देया जनता छाय मदाना' दक चिनाखं च्वयो जनतात सचेत यागु खाँ लुमांक दिल ।

प्रा. डा. धर्मराज डंगोल जुं समाजया विकास याय्ता सामुहिक ग्वाहाली आवश्यक जूगु खाँ कांसे थःगु तुतिखय् चुयो दानय्गु खःसा कःसि खेती नपां न्ह्यं न्ह्यंगु प्रविधि व थी थी कृषि याय् सय्के मः धायोदिल । वयकलं साहित्य मुंज्याय् न्ह्यंगु प्रतिभा तय्यानिंति साहित्य च्वय्गु तालिम बियमः धायोदिल ।

सडक पीडित संघर्ष समिति यलया कजि अशोक महर्जनं सडक पीडित पिनिगु समस्या न्ह्यब्वसे लाँ तः ब्याकय्गु व लाँ दय्केगु जक विकास मखु धायोदिसे उथिंयंकः विकासया निंतिं स्वनिगलं पिनय् भौतिक विकास याय्मः धायो दिल ।

जनसाहित्य गोष्ठीया संस्थापक नायो श्रीकृष्ण महर्जनज्या सभानायोलय् जूगु ज्या इवःसं मदन श्रेष्ठ, रमेश डंगोल, शैलेष डंगोल, रमेशमान महर्जन, सुवर्ण महर्जन, कान्छा बाबु महर्जन, मेरिना महर्जन, बासुदेब डंगोल, रामचन्द्र महर्जन, नरमान महर्जन जु पिसं चिनाखं ब्वड् द्यूगु खःसा मनहेरा श्रेष्ठ, मनिता श्रेष्ठ, यल, यशुमति महर्जन केपु व श्रमिक कला सदन ख्वप पाखं म्येँ हाल द्यूगु खः । ज्या इवः नारायण महर्जन जुं न्ह्याक द्यूगु खः ।

वागीश्वरी कलेजया च्याकगू सभा

पुस १८

ख्वप नगरपालिकाया प्रमुख नपां वागीश्वरी कलेज ब्यवस्थापन समितिया नायो सुनिल प्रजापतिया मू पाहाँलय शनिबार वागीश्वरी कलेजया च्याकगू सभा जुल । उगु सभासं नगरप्रमुख प्रजापति जुं जनताया साथ व सहयोगया हःनय् धेबा छुं हे मखु धायोदिसे ख्वप नगरपालिकाय् पर्यटन शुल्क द्रहँ मवसां जनताया साथ दःगुलिं विकास निर्माणया ज्यात जुयो च्वंगु खौं ब्याकसे वयकलं छुं न संघ संस्थाया विकास जुइगुलि दुस्य बलागु



आन्तरिकपक्षं मुख्य जुइगुलिं कलेजया विकासया लागिं ज्या साड च्वंपुं शिक्षक कर्मचारी नपां फुक्क पक्षया मिहेनत मदयक मगा धायो दिल ।

वयकलं कलेजया विकासया निंतिं पिनय् याय्गु स्रोत मदयक मगा दक च्वनय्गु गलत जुइगु खौं धायोदिसे ख्वप नगरपालिकां विकासया नामय सुनं ब्युगु सर्त दःगु ग्वाहाली मकसें

थःगु हे तुतिखय् दाड च्वडागु खौं ब्याकसे जापानी सरकारं नेपालय् हे दकलय् न्हःपां श्वास प्रश्वास पुनः स्थापना केन्द्र निशर्तकाथं ख्वप नगरपालिकाय् निस्वानय्गु मञ्जुर याडागु खौं काड दिल ।

वागमती प्रदेशया सांसद सुरेन्द्र राज गोसाइँ जुं देया राजनीति फहिलवांगुया मु हुनि शासकपाटीं नेकपाया सैद्धान्तिक विचलन पद व धेबा भागवण्डा खः धायो दिल । वयकलं नेकपा दुनयया लोभी, पापी, द्रब्यपिशाच व दासमानसिकतां जुगु संसद विघटनया घटना औचित्यपूर्ण जू । सिक्किम जुइगुलिं बचे जुल धायो दिल ।

वागीश्वरी मा.वि. या प्रधानाध्यापक कृष्ण प्रसाद धन्छां म्हवचा लगानी, म्हवचा चासो, अपः लगानी अपलं चासो तैगु थौं कन्हेया अभिभावकपिनिगु मानसिकता हिइक यंकय् मःगु खौं ब्याकसे शिक्षक व ब्वनामिपुं लिपा, स्वपागु तुतिकाथंया अभिभावक पिसं बांलागु भूमिका म्हेतसा कलेज मथां विकास जुइगु विश्वास प्वंक दिल ।

वागीश्वरी कलेजया कजि ज्ञानसागर प्रजापतिजुं सरकारं शिक्षाया जिम्मा त्वः त बिस्यु वाड च्वंगु थौं या इलय् कलेजं हे शैक्षिक गुणस्तर हछ्याय्ता थः हे हःनय् वानय्गु बाहेक मेगु लाँपु मरु धायोदिल ।

कलेज ब्यवस्थापन समितिया नायो सुनिल प्रजापतिया सभानायोलय् जूगु ज्या इवःसं कलेजया प्राचार्य धनकुमार श्रेष्ठ जुं पिब्वयो द्यूगु वार्षिक प्रतिवेदन २०७६/७७ संशोधन नपां पारित जुल ।

ब्वनय् कुथि निरीक्षणय् नगर प्रमुख

पुस २०

ख्वप नगरपालिकाया प्रमुख सुनिल प्रजापति जु ख्वपया समता शिक्षा निकेतन, इष्ट प्वाइन्ट एकेडेमी, रोम्बस स्कूल व पारागन एकेडेमी भायो निरीक्षण याड दीसे उगु ब्वनय् कुथिया प्रिन्सिपलत नपालाड ब्वनय्कुथिया शैक्षिक अवस्था व कक्षा सञ्चालनया जानकारी कायो दिल ।

कोभिड महामारीया हुनि तिड तःगु ख्वप नगर दुनय्या ब्वनय्कुथित इलय् हे सःत आखः ब्वंक च्वंगु दः । उगु ल्वययाता बिचः याड फुक्क ब्वनामिपिन्ता अनिवार्य मास्क तय्क, ताः ता पाकः सामाजिक दूरी कायम याड पालंपः आखः ब्वंक च्वडागु दक ब्वनय्कुथिया प्रिन्सिपलपिसं धायो द्यूगु खः ।



उगु निरीक्षण पुचलय ख्वप नगरपालिका वडा नं. १० या वडाध्यक्ष लक्ष्मी प्रसाद ह्योमिखा नं भःगु खः ।

ब्वनय् कुथित माघ १ गते निसैं चाय्किगु

पुस २१

खप नगरदुनय् न्ह्याकचवंगु फुक्क ब्वनय्कुथित २०७७ माघ १ गते निसैं न्ह्याकिगु जुयो चवंगु दः । खप नगरसमितिया नायो नपां खप नगरपालिकाया प्रमुख सुनिल प्रजापतिया नायोसुई चवंगु नगरशिक्षा समितिया बैठकं उगु निर्णय यागु खः ।

कोरोना भवल्वयया कारणं ता ई निसैं ब्वनय्कुथित तिडतयमःगुलिं आखः ब्वंकयगुलि तप्यंक असर लाड चवंगु याता बिचः याड श्वनं हॉ मसिर २३ गते चवंगु समितिया बैठकं नगरपालिका दुनय चायक तःगु सामुदायिक व संस्थागत ब्वनय्कुथित २०७७ पुस १ गते निसैं च्यागू, गुगू, हिगू तगिता पालं पः याड ब्वनय्कुथी हे सःत आखः ब्वंकयगु निर्णय काथं ब्वनय्कुथित चायके धुंकल । बैठकं अभिभावकपिनिगु पूर्व स्वीकृति, ब्यवस्थापन समितिया निर्णय व पूर्वतयारी व कार्ययोजना दयकः बाल बिकास निसैं हिंन्यगू तगिं तकया कक्षा चायकेता फुक्क ब्वनय्कुथिता पौ चवयगु निर्णय याता ।



ब्वनय्कुथि न्ह्याकयगु इवलय् ब्वनामिपुं व शिक्षक/कर्मचारी पिन्के कोरोना भवल्वयया लक्षण खानय् दःसा मः काथं ब्वनय् कुथि पुरा व आंशिक रुपं तियता नगर शिक्षा शाखां निर्देशन बिय फैगु ब्यहोरा नं स्वापु दःगु ब्वनय् कुथिता जानकारी बियगु निर्णय बैठकं याता ।

खप नगरपालिकाय् कृषकत मुंकल

पुस २१

खप नगरपालिका कृषि समितिया ग्वसालय कृषकत मुंकः खप नगरपालिकाया प्रमुख सुनिल प्रजापतिजुं नेपः या सरकारं शिक्षाखय् नवउदारवादी नीति कःथें कृषि खय् नं विदेशी पुँजी दुकायगु काथं नवउदारवादी नीति कःगु खाँ काड दिल् ।

नेपः या सरकारया मन्त्री परिषदं कृषिखय् विदेशी लाय छ्यलय् दैगु व अथे याड लायछ्यल सयकगु अन्न (सत्तरी प्रतिशत) सच्छीखय् न्ह्युब्वः कृषि उत्पादन विदेशय् निर्यात याय् दैगु व



सच्छी खय् स्वीब्व दक नेपालय हे मिय दैगु याड दयकगु प्रावधानं नेपःया किसान तयता समस्या जुइगु खाँ वयकलं धायो दिल् ।

खप नगरपालिकां कृषकपिनिगु आर्थिक समृद्धिया नितिं थी थी कृषक तालिम ब्यू ब्यू वयागु खाँ ब्याकसे वयकलं थःगु तुतिखय् दानय् फय्केगु ज्या काथं किसान तयता फाइदा जुइगु खाँ नं ब्याक दिल् ।

उगु भेलाखय् खप नगरपालिका वडा नं. ७ या वडाध्यक्ष उकेश कवां जुं किसानत राजनैतिक रुपं सचेत व सडगठित जूसा आर्थिक रुपं नं बांलाइगु खाँ ब्याक दिल् ।

अथेहे खप नगरपालिका वडा नं. ३ या वडाध्यक्ष नपां ज्या इवःया सभा नायो राजकृष्ण गोरा जुं नेपःया सरकारं विइगु अनुदानता गथे ब्यवस्थित याय्गु धाय्गु विषय सल्लाह याय्ता बैठक सः ता गु खाँ ब्याक दिल् । अथेहे ६ वडाया वडाध्यक्ष हरिराम सुवाल जुं किसान तयगु आर्थिक स्तर थाकाय्ता खप नगरपालिका चां न्हिं मधसैं जुयो चवंगु खाँ काड दिल् ।

उगु ज्या इवःसं कृषि प्राविधिक सविन ख्याजु, खप नगरपालिका वडा नं. १० या वडाध्यक्ष लक्ष्मी प्रसाद ह्योमिखा, कृषकपुं पूर्णभक्त सुवाल, राधेश्याम सुवाल पिसं नं न्वचु तयो द्यगु खः ।



ड्यस्वंगुगु स्वप पौ, बःछि पौ(पाक्षिक)



भक्तपुर औद्योगिक क्षेत्र प्रदुषण पिकाइगु उद्योग कलकारखानात चिडकेगु विषय स्थानीय जनत याड च्वंगु संघर्षया विषय ख्य मःगु सुनुवाइ याकयूत मङ्गलबार नेपाल मजदुर किसान पार्टीया छ्याञ्जे प्रेम सुवाल नपाया प्रतिनिधिमण्डलं उद्योग विभागया महानिर्देशक जीवलाल भुषालनपां छलफल याड दिल ।

ख्वप नगरदुनयया पसल्यात मुनेज्या

ख्वप नगरपालिकाया प्रमुख सुनिल प्रजापतिया नायो सुई ख्वप नगर दुनय्यन पसल्यात पुस २३ गते नगरपालिकाय मुनेज्या जुल ।

उगु भेलासं नगर प्रमुख प्रजापति जुं ब्यापार सेवा व्यवसाय जूगुलिं सामान मिय बलय् मियगु मू च्वयो बांलागु भिंगु, गुणास्तरीय सामानत मियो उपभोक्ता पिनिगु मन त्याकः ब्यापार याय्मः धायोदिसे व्यवसायी पिनिगु कारणं उपभोक्ता पिनिगु स्वास्थ्यसं बाँमलागु लिचवः लाइगुलिं अजगु व्यवसायं थःगु व्यवसाय हे ताथपल्टय् जुयफःगुलिं सचेत जुयता सल्लाह बियो दिल । वयकलं नगरपालिकाया बजेट नगरवासीपिनिगु भिं ज्याख्य हे छ्यलय्गु उद्देश्यं उपभोक्ता समिति पाखं निर्माण कार्यता हः छ्याड ज्या याड च्वंगु नपां नगरबासीपिंगु जीवन च्वन्ह्याकयूता नगरपालिकां मःगु नीति दय्क ज्या साड च्वंगु खाँ ब्याक दिल ।

प्रमुख प्रजापति जुं ख्वप नगरपालिकां सम्पदा म्वाकः तय्गु ज्या इवः ख्य हज्याड च्वंगु खाँ ब्याकसे ख्वप देयाता तस्कं बांलागु सुन्दरी नगर दय्केगुमतिं हज्याड च्वंगु खाँ ब्याक दिल ।

वयकलं व्यवसायीपिसं इलय हे पसः दर्ता याय् मःगु, नगरपालिकाता पुलय् मःगु कर इलय हे पुलय् मःगु नपां सुचुकुचु ख्य बिचः याड पसः चाय्केमःगु खाँ न ब्याक दिल ।

ज्या इवःसं ख्वप नगरपालिका वडा नं. ७ या वडाध्यक्ष उकेश कवां जुं पसः तैपुं व्यवसायी पिसं पसलय् मिइगु सामानया म्याद दः मरु स्वय मःगु, गुणास्तर चिं दःगु नसा ज्वलंत मिय मःगु खाँ ब्याकसे व्यवसायीपिसं जनताया स्वास्थ्यसं बाँमलागु लिचवः लाइगु ज्या गुब्लें हे याय् मज्य् धायोदिल ।

ख्वप नगरपालिका वडा नं. ३ या वडाध्यक्ष नपां बजार अनुगमन समितिया दुजःराजकृष्ण गोरा जुं चिच्या -चिच्या हांगु व्यवसायत प्वयचिनय् मः दक नगरपालिकां न्ह्याब्लें ग्वाहाली



याड च्वंगु खाँ ब्याकसे चिच्या चिच्या हांगु पसः या व्यवसायीत छप्पा जुयमः धायो दिसे वयकलं अः याय्महा सरकार पुँजीपति वर्गया पक्ष्य ज्या सानिगुलिं सरकारया ब्यापार नीति चिच्या - चिच्या हांगुं ब्यापारी तय्गु पक्ष्य मरुगु खाँ ब्याक दिल ।

ख्वप नगरपालिका वडा नं. ६ या वडाध्यक्ष नपां बजार अनुगमन समितिया दुजःहरिराम सुवाल जुं नगरपालिकां बजारय् वाड स्वय्गु ज्या यासेलिं पसः व्यवसायीपिन्के छुं भाति सुधार वगु खाँ कांसे पुलय् मःगु कर इलय हे पुलय्मः धाय्गु बांलागु बिचः ब्वलांगु बांलागु खाँ खः धायोदिसे थुकिं नगरपालिकाता ग्वाहाली जुइगु खाँ ब्याक दिल ।

कार्यपालिका दुजः नपां बजार अनुगमन समितिया दुजःरोशन मैयाँ सुवाल जुं बजार अनुगमन याय्गु इवलय् जुयो च्वंगु बाँमलागु ज्यात खाडागु खाँ ब्याकसे नय मज्य्गु अखाद्यवस्तुत ममियता अनुरोध याड दिल ।

ज्या इवःसं व.नि.राम कृष्ण प्रजापति जुं नं न्वचु तयो द्य्गु खःसा आना भःपुं पसलयापिसंनं राय-सुभावात बियो द्य्गु खः ।



इयस्वंगूगु स्वप पौ. बःछि पौ(पाक्षिक)



थी थी जिल्लाय स्तालिन व माओ जयन्ति



खप : विश्व सर्वहारा वर्गया नेम्हा महान गुरु स्तालिनया १४१ कगु व माओत्सेतुङ्गया १२७ कगु बु दिंया लसताय नेपाल मजदुर किसान पार्टी देया थी थी जिल्लाय

पिनिम्हा जूगुलिं २०२१ सालया भूमिसुधार काथं हदबन्दी कार्यान्वयन मया । किसान तय्के दःगु छुं छुं जग्गा कम्पनीया नामय् हदबन्दी स्वयो अपः जग्गा तय् दैगु कानुनी बन्दोबस्त नपां अः उद्योगी-ब्यापारीया लाहातय् जग्गात बुलुहुं लाक यंक चवंगु खाँ ब्याक दिल ।

प्रशिक्षण व अन्तरक्रिया ज्या इवः न्ह्याक चवंगु दः ।

थव हे इवल्य् नेपाल क्रान्तिकारी किसान संघ खप जिल्ला समितिया ग्वसालय शनिबार छगू प्रवचन ज्या इवः जुल । ज्या इवःसं नेपाल मजदुर किसान पार्टीया छ्याञ्जे प्रेम सुवाल जुं चिनियाँ क्रान्तिया नेता व संसारया ज्या साङ्ग नैपुं ज्यामि (मजदुर) वर्गया गुरु माओत्सेतुङ्गं दे व जनताया सेवाखय् लगे जूइबलय् वइगु पंगः त, थाकु अःपु मधसें ल्वाङ्ग हज्याइम्हा योद्धा खः धायोदिसे नेमकिपाया कार्यकर्तापुं नं दे व जनताया सेवा खय् हज्याय् बलय् वइगु पंगः खाङ्ग मग्यासिं ल्वाङ्ग हज्याय्मः धायोदिल ।

वयकलं लाँ, ताँ व मेमेगु भौतिक पूर्वाधार दयकी बलय् छ्वाय् नइपुं मनूतय्सं विकास याडागु दक धःगु खाँ भुट्टा खः धायोदिसे जनताया सांस्कृतिक स्तर (शैक्षिक व बौद्धिक विकास) थाकाय्गु जक विकास खः धायो दिल ।

जनताया आर्थिक मागयाता राजनीतिक संघर्ष नपां स्वाय् ह्यमःगु खाँ छ्याञ्जे सुवाल जुं प्वकसे पुँजीवादी व्यवस्थाय् हि याय्गु नाता स्वयो धेबाया नाता क्वातुङ्गुलिं सरकार जमिन्दार

वयकलं भारतया एकाधिकार पुँजीं नेपः दे ता थःगु तुतिखय् दानय् फय्कः अर्थतन्त्रया विकास याकी मखु । अलय् सः कारखाना नं चाय्के बिइ मखु नपां जा थुय्ता छ्यलिगु ग्याँसया पलि जलविद्युतया विकास नं याकय् बिइमखु । भारतीय विस्तारवादं नेपःया न्हय्छगू थासय् स्वयो अपः ६० हजार हेक्टर स्वयो अपः भीगु जग्गा त्यल काय् धुंकगु खाँ ब्याकसे संसदीय व्यवस्थाय् कार्यकारी अधिकार दःम्हा राष्ट्रपति व प्रधानमन्त्रीकय् 'गोली जःगु बन्दुक' दै उकिं अः प्रतिनिधि सभा विघटन यागु खाँय् थुकाथं काय्मः धायो दिल ।

छ्याञ्जे सुवाल जुं मनूतय्ता लोभं छुं भाति लाभ जूसां उकिं लिपा विलाप (दुःख) हे जुइगु लिं शत्रुया जालं तापाकक चवनय् मः दक सल्लाह बियो दिल ।

पार्टीया केन्द्रीय दुजः कमल मैयाँ सुवाल जुं बहुमत ज्या साङ्ग नैपुं ज्यापु ज्यामि पिन्ता राजनीतिक रुपं सचेत याङ्ग छप्पा छधि याङ्ग हज्याकः देशय् समाजवादी क्रान्ति सफल याय्ता नेमकिपां संघर्ष याङ्ग चवंगु खाँ काङ्ग दिल ।

ग्वसाखलया नायो गोविन्द दुवाल जुं इतिहासं सय्क थुइक न्हँगु पुस्ता हज्याय मः धायोदिल ।

ज्या इवःसं नेमकिपा खप जिल्ला समितिया नायो न्हुच्छे भक्त फौजु, हरिराम सुवाल, सुर्यबहादुर फौजु व नारायण भक्त न्हेमाफुकी पिसं नं न्वचु तयो द्यूगु खः ।

यँ देः

नेमकिपा यँ जिल्ला समितिया ग्वसालय् शुक्रबार 'श्रमिक' वापौ व मजदुर न्हिपौ या विषय छगू अन्तरक्रिया ज्या इवः जुल । स्तालिन व



REDMI NOTE 9
AI QUAD CAMERA



इयस्वंगूगु स्वप पौ. बःखि पौ(पाक्षिक)

माओत्सेतुङ्ग बुद्धिया लसताय जूगु उगु ज्या इवःसं नेपाल मजदुर किसान पार्टीया छयाञ्जे प्रेम सुवाल जुं नेपःया पूँजीवादी पार्टी तयता लाहाताय कायो भारतीय विस्तारवादं नेपालय् अस्थिरता याड तयगु स्वगु खाँ काड दिल ।

वयकलं भारतीय विस्तारवादं नेपालय् प्रचण्ड व माधव नेपाल पक्षया ब्वहल्य बन्दुक दिकः ओलिया सिकार याय् तांगु चर्चा यासे सत्ताय् च्वपुं पार्टीया नेता व कार्यकर्ता सिद्धान्तहिन व गलत बिचः या लिच्चं थौं नेकपाया दुर्दशा जूगु खाँ स्पष्ट याड दिल ।

नेमकिपा यँ जिल्ला समितिया नायो नारायण महर्जनया सभानायोलय् जूगु ज्या इवःसं नेमकिपाया केन्द्रीय दुजः राजवीर डंगोल, नेमकिपाया वैकल्पिक केन्द्रीय दुजः नारायण बहादुर दुवाल, हरिकुमार महर्जन, सुनिल महर्जन, नरेश महर्जन, अशोक महर्जन, कविन्द्र डंगोल, विश्वक डंगोल, रमेश डंगोल, मदन श्रेष्ठ, महेन्द्र ब्रम्हाचार्य श्याम कुमार महर्जन पिसं नं न्वचु तयो द्यगु खः ।

थुगु हे दिनया लसताय नेमकिपा टोखा नगरसमितिया ग्वसालय 'श्रमिक' वा पौ व मजदुर न्हि पौ या अन्तरक्रिया अनलाइन पाखं जुल ।

ज्या इवःसं नेमकिपाया केन्द्रीय दुजः नपां खवप नगरपालिकाया प्रमुख सुनिल प्रजापति जुं नेकपाया नेता तयसं बहुमत दःगु थःगु हे सरकारता देश व जनताया नितिं ज्या सानयता हृष्ट्यायगु स्वयो प्रधानमन्त्री, मन्त्री व पार्टी नायो हिलयगु कासा खय् जक प्रधानमन्त्री केपी ओलीता प्याहाँवय मछिंक ज्या सानय मजिक लाहाज्वड तयगु कुतः यासेलिं प्र.मं. संसद हे विघटन याड ब्युगु खाँ काड दिल ।

वयकलं पार्टीया गतिविधि हृष्ट्याडः जनताया दश्वी वाडः दलाल पूँजीवादी पार्टी व नेतातयगु कर्तुत काड जनतात सचेत यायता इनाप याड दिल ।

नेमकिपाया केन्द्रीय दुजः नपां यँ जिल्ला समितिया नायो नारायण महर्जन स्तालिनया बूदिं हानयगुया अर्थ वयकया योगदान लुमांक वयक पाखं सय्केगु खः धायोदिल ।

ज्या इवःसं नेमकिपा बैकल्पिक केन्द्रीय दुजः नारायण बहादुर दुवाल, नेमकिपा टोखा नगरसमितिया नायो रवीन्द्र डंगोल, महेन्द्र ब्रम्हाचार्य, मदन श्रेष्ठ, हरिकुमार महर्जन, श्री कुमार महर्जन, मिना डंगोल, शैलेश डंगोल, कमल बहादुर डंगोल, रमेश डंगोल पिसं नं न्वचु तयो द्यगु खः ।

कालीकोट

विश्व सर्वहारा वर्गया नेम्हा नेतापुं स्तालिन व माओत्सेतुङ्गया बुद्धिया लसताय नेमकिपा कालीकोट जिल्ला समितिया ग्वसालय

प्रशिक्षण ज्याइवः जुल ।

ज्या इवःसं पार्टीया केन्द्रीय दुजः नन्द बहादुर शाही जुं चिनियाँ कम्युनिष्ट आन्दोलनया अध्यक्ष माओया योगदानया खाँ कांसे मार्क्सवाद-लेनिनवादत चीनय् छ्यलयता सफल जूगु खाँ ब्याकदिला नपां वयक चीनयाम्हा जक नेता मखुसँ सकल सर्वहारा वर्गता लाँपु क्यड द्यम्हा विश्वया ज्या साड नैपुं ज्यापु - ज्यामि जनताया नेता खः धायो दिल ।

वयकलं 'जनयुद्ध' या नामयँ सत्ताय वापुं पार्टी तयसं माओया विचारधारा काथं ज्या मसांगु खाँ ब्याकसे अमिसं माओविचारधारा सत्ताय वानयगु स्वःन्हचा जक यागु खाँ काड दिल ।

पार्टीया मेम्हा केन्द्रीय दुजः नवराज कोइराला जुं माओया सहि विश्लेषणं हे चीनय न्हँगु जनवादी क्रान्ति सफल जूगु खः धायो दिल ।

ज्या इवःसं खड्गराज शाही, धर्मदत्त अधिकारी, रत्ना भण्डारी, खडानन्द अधिकारी पिसं नं थः थः गु बिचः प्वंक द्यगु खः ।

जुम्लाः

अथेहे नेपाल मजदुर किसान पार्टी जुम्ला कनका सुन्दरी वडा नं. ८ गाउँ समितिया ग्वसालय शुक्रबार छगू अन्तरक्रिया जुल । ज्याइवःसं पार्टीया केन्द्रीय दुजः दिल्ली प्रसाद काफ्ले जुं संसद विघटन स्वाभाविक जुगु चर्चा यासे संसदीय ब्यवस्थाया मूल्य-मान्यता काथं प्रधानमन्त्रीकय् संसद विघटन यायगु विशेषाधिकार दःगु खाँ ब्याकसँ नेकपाया ल्वापु सैद्धान्तिक मखुसँ ब्यक्तिगत व स्वार्थ प्यागु खाँ काड दिल । वयकलं नेकपा व नेपाली कांग्रेस ज्यासाड नैपुं ज्यापु-ज्यामि पिंगु भिं मयाइगु खाँ ब्याकसँ ज्यासाड नैपुं वर्गया नितिं भिं याइगु ब्यवस्था ह्यता समाजवादी ब्यवस्था ह्यमः धायोदिसे नेमकिपां जनताया प्रजातन्त्र जुजुं समाजवादी ब्यवस्था निस्वानयता संघर्ष याड च्वंगु खाँ काड दिल ।

वयकलं विश्व समाजवादया लहर ह्यता स्तालिनया तः हांगु लाहा दः थे चीन विश्वया महाशक्ति जुय फः गुलि चीनया न्हँगु जनवादी क्रान्तिया महत्वपूर्ण योगदान दः धायो दिल ।

नेपाल क्रान्तिकारी शिक्षक संघया केन्द्रीय दुजः तिर्थ बहादुर शाही जुं समाजवादी ब्यवस्थां जक देशय् ह्यपा ह्यफैगु खाँ ब्याकसे जनताता पूँजीवाद व समाजवाद छु खः धायगु खाँ ब्याकक काड सचेत याय्मः धायोदिल ।

ज्या इवःसं भरत शाही, तारा शाही, धनु काफ्ले, शेरबहादुर शाही पिसं नं न्वचु तयो द्यगु खः ।



इयस्तंगूगु स्वप पौ. बःछि पौ(पाक्षिक)

श्वहे दश्वी शनिबार नेमकिपा जिल्ला समिति जुम्लाया गवसालय् माओया बुदिं हान । उगु ज्या इवःसं नेमकिपाया केन्द्रीय दुजः डिल्ली प्रसाद काफ्ले, राजेश्वर देवकोटा, विष्णु के.सी. धमेन्द्र अधिकारी, भीम नेपाली, सन्त बहादुर खत्री, पूर्णलाल खत्री व जयकृष्ण न्यौपाने पिसं नं थः थः गु बिचः प्वंकः द्यूगु खः ।

श्वनं न्हापा चन्दन नाथ नगरपालिकाय् स्तालिन दिवस डाय्कल । राजेश्वर देवबोटाया मू पाहाँल्य् जूगु उगु ज्याइवःसं विष्णु केसी, बलबहादुर बूढथापा व यज्ञबहादुर बुढथापा पिसं स्तालिनया योगदानबारे चर्चा याड् दिल ।

दैलेख

स्तालिन व माओत्सेतुङ्ग या बुदिया लसताय् नेमकिपा दैलेख आठबीस नगरपालिका वडा नं. ८ या गवसालय् वडास्तरीय कार्यकर्ता मुंक्यगु ज्या शनिबार जुल ।

सभासं नेमकिपाया केन्द्रीयदुजः बजिर सिंह बिच जुं मार्क्सवाद लेनिनवाद व माओत्सेतुङ्ग विचारधारा क्यच्चाड् नेमकिपा मार्ग निर्देशक काथं कायो सकलसिता लाँपु क्यडः च्वंगु खाँ ब्याक दिल ।

ज्या इवःसं विष्णुबहादुर कठायत, जय बहादुर बदुवाल, दलबहादुर सिजापति, रणबहादुर सिजापति, नवीन सिजापति, कटक बहादुर विश्व कर्मा व भीमराज कठायत पिसं न्वचु तयो द्यूगु खः ।

कैलालीः

स्तालिन व माओत्सेतुङ्गया बुदिया लसताय नेपाल क्रान्तिकारी महिला संघ कैलाली जिल्ला समितिया गवसालय शनिबार प्रशिक्षण ज्याइवः जुल । ज्याइवःसं नेमकिपा केन्द्रीय समितिया दुजः खगेन्द्र बहादुर शाही जुं स्तालिन व माओया जीवनी ब्वडः वयकपिति जीवनी पाखं शिक्षा कायो हज्याय्मः धायो दिल ।

वयकलं मार्क्सवाद व लेनिनवादता व्यवहारय् छ्यलः सोभियत संघय् समाजवाद स्थापना याय्ता स्तालिनया तः हांगु लाहा दःगु खाँ ब्याक दिल । मार्क्सवाद व लेनिनवादया लाँपु ज्वड् चीनय थःगु देया ल्वःगु 'न्हूगु जनवादी क्रान्ति' याय्ता अध्यक्ष माओ तः लागु खः नपां थौं कन्हे चीन

विश्वया महाशक्ति जुयफःगुलि अध्यक्ष माओया तः हांगु लाहा दः धायोदिल । उकिं समाजवाद व पुँजीवाद छु खः दक जनताता काँकां थुकिदुनय्या धात्थेगु खाँ थुइक्य् बियमः धायोदिल ।

नेमकिपा कैलालीया नायो रमेश कुमार रावल जुं माओत्सेतुङ्गया रचनात ब्वड् व्यवहारय् लागु याय् मःगु कर्तव्य कार्यकर्ता तयसं थुइक्य् मः धायोदिल ।

नेपाल क्रान्तिकारी शिक्षक संघया केन्द्रीय दुजः जङ्गबहादुर तारामी जुं मार्क्सवादी सिद्धान्त काथं थः ता व समाजता हिलयंक्य गु ज्याख्य् छ्यलय् फःसा स्तालिन व माओता लुमांक बुदिं हाडागुया सार दैगु खाँ ब्याक दिल ।

गवसाखलया नकिं लक्ष्मी पुनया नकिल्य् जूगु ज्या इवःसं हिक्मत भण्डारी, राजकुमारी शाही, लक्ष्मी तारामी पिसं नं न्वचु तयो द्यूगु खः ।

श्वहे इवल्य् नेमकिपा कैलाली जिल्ला समितिया गवसालय मङ्गलबार प्रशिक्षण ज्या इवः नं जुल

ठ्वैतः(काभ्रे)

नेमकिपा काभ्रे जिल्ला समितिया गवसालय् स्तालिन व माओया बुदिया लसताय शनिबार बिचः गोष्ठी जुल । गोष्ठीसं नेमकिपाया बैकल्पिक केन्द्रीय दुजः नारायण बहादुर दुवाल जुं स्तालिन व माओत्सेतुङ्गया योगदान हस व चीनता जक मखु संसारया ज्या साड् नैपुं ज्यापु ज्यामिपिनिगु लागिं तस्कं बांलागु व सान्दर्भिक जूगु खाँ ब्याक दिल ।

नेमकिपा काभ्रे जिल्ला समितिया नायो कृष्ण कुमार बैद्यजुं सरकारता थःगु हे पार्टीया मनू तयसं ज्या सांक्य् मब्यूसें पंगः थानय् हःगु म्वः मरुगु दवावत ब्यूगु पद व धेबाया निंतिं





इयस्वंगुगु स्वप पौ. बःखि पौ(पाक्षिक)

सीड ज्या साड जूगुलिं थौ या ई स्वयमःगु खः धायोदिसे कुसीं ल्यंकतयूता दिल्ली दरवारया खापा ध्यू वानय् गु स्वयो जनताया अभिमत कायूता वानय्गु हे बांलागु लाँपु धायो संसद भङ्ग याडागु जक प्र.म. ओलीं निति सम्मत धायो च्वंगु खाँ धायो दिल ।

ज्या इवःसं डा. हरिप्रसाद मानन्धर, त्रिरत्न सायमि, भोला खरेल, ज्ञानेन्द्र डंगोल, तुलाराज शाही ठकुरी, राजु तामाड पिसं नं न्वचु तयो द्यूगु खः ।

श्वहे इवलय् नेपाल क्रान्तिकारी युवा संघ काभ्रे जिल्ला समितिया गवसालय् मङ्गलबार छगू प्रवचन ज्या इवः जुल ।

सुर्खेतः

माओ व स्तालिनया बुदीया लसताय नेपाल क्रान्तिकारी युवा संघ सुर्खेत जिल्ला समितिया गवसालय् जनताया प्रजातन्त्र' विषय अन्तरक्रिया ज्या इवः जुल ।

नेमकिपा सुर्खेतया नायो हरिबहादुर बोहरा जुं चीनय् माओया योगदानं याड अः चीन विश्वया न्ह्यलुवा दे काथं हज्यायगु क्षमता दःगु खः धायोदिल ।

नेमकिपा सुर्खेतया न्वकु प्रेमकुमार थापा जुं नेपः या परिस्थितिलय् समाजवादी क्रान्ति हज्याकयूता जनताया प्रजातन्त्रया विषय जनताया दश्वी अपलं छलफल याड थुइकय् बिय फय्मः धायोदिल ।

ज्या इवःसं नेमकिपा सुर्खेतया छ्याञ्जे धनेन्द्र बिक, नेपाल क्रान्तिकारी किसान संघया केन्द्रीय दुजः ऐन बहादुर शाही, गणेश खड्का, अक्कल बहादुर राना, तुल्सि खड्का, अङ्ग बहादुर शाही, हस्त बहादुर साँवद, मान बहादुर विक, चेतन पौडेल, पर्व कार्की, गोविन्द नाथ योगी, खेमराज कँडेल, जगत लामिछाने पिसं नं न्वचु तयो द्यूगु खः । ज्या इवः नेपाल क्रान्तिकारी युवा सङ्घ सुर्खेतया नायो लाल बहादुर थापाया सभानायोलय् जूगु खः ।

महानगरय् स्तालिन दिवस

नेपाल मजदुर किसान पार्टी येँ महानगर समितिया गवसालय् बुद्धबार विश्व सर्वहारा वर्गया महान गुरु स्तालिनया १४१ कगु बुदिया लसताय श्रमिक वा पौ व मजदुर न्हि पौ या विषय अन्तरक्रिया ज्या इवः जुल ।

ज्या इवः सं नेमकिपाया केन्द्रीय दुजः सनकमान महर्जन जुं पुँजीवादी पार्टीं तय्गु लथालिङ्ग पहः या खाँ कुल दिसे सिद्धान्तहिन व गलत विचः या कारणं नेकपां थौया दुर्गति फय् मःगु खः धायोदिल । वयकलं महामारीया इलय् जनताया समस्याता

हदाय् तयो जनताया सेवा याय् मःगु इलय् सरकारवादी पार्टींत थः वं थवय् पद व धेबाया खाँ खय् ल्वाड तज्याड च्वंगु दः धायोदिल ।

नेमकिपाया केन्द्रीय दुजः नारायण महर्जनं विश्व सर्वहारा वर्गया महान गुरु स्तालिनया योगदानया खाँ काड दिल

नेमकिपाया केन्द्रीय दुजः राजवीर डंगोल जुं मखुपुं मनूतय्गु लाहातय् सत्ता लः वांगुलिं जनतां दुःख स्यूगु खाँ काड दिल ।

नेमकिपा येँ महानगर समितिया नायो सुरेन्द्र महर्जनया सभानायोलय् जूगु ज्या इवःसं पार्टीया बैकल्पिक केन्द्रीयदुजः नारायण बहादुर दुवाल, मदन श्रेष्ठ, महेन्द्र ब्रम्हचार्य, कुल नारायण डंगोल पिसं थः थः गु बिचः प्वंक द्यूगु खः ।

थुगु हे इलय् नेमकिपा केषु नगर समितिया गवसालय् श्रमिक वापौ व मजदुर न्हि पौ या अन्तरक्रिया ज्या इवः जुल ।

अथेहे पुस २३

विश्व सर्वहारा वर्गया महान गुरुपुं स्तालिन व माओत्सेतुडया बुदिया लसताय नेपाल मजदुर किसान पार्टी, सुर्यविनायक नगरपालिका वडा नं. ५ कटुञ्जे छगू अन्तरक्रिया गवसग्वल ।

ज्या इवःसं नेमकिपाया केन्द्रीय दुजः सरोजराज गोसाईं जुं देया कमजोर राजनीतिक अवस्थां प्रतिक्रियावादीतय्सं फाइदा काय् फःगुलिं क्रान्तिकारी शक्तिं जनताया नेतृत्व याय्मःगु बिचः प्वंकसे वैदेशिक हस्तक्षेपया कारणं देशय् पटक पटक राजनीतिक अस्थिरता याड च्वंगु खाँ नपां जलाखाला देशं नेपः या राजनीतिक स्थिरता या आशायाड च्वंगु लसकुस याय् लाइकगु खाँ काड दिल ।

देया स्वाधिनता नपां स्वतन्त्रता म्वाकः तयूता नेपः मिपुं सक्षम जूगु खाँ ब्याकसेँ अः या इलय् नेमकिपां नेतृत्व मकसेँ मज्यूगु विचः नं वयकलं प्वंक दिल । स्तालिन व माओया थजगु उच्च मनोबल, दृढता सरलता व त्याग मदय्कं देया स्वतन्त्रता ल्यंक तय् मफैगु विच नं प्वंक दिल ।

नेमकिपा सुनपा, नगर समितिया नायो सुर्यभक्त त्वाती जुं देया राष्ट्रिय व अन्तरराष्ट्रिय पस्थितिया बांलागु विश्लेषण याडः स्तालिन व माओ दे व जनताया स्वतन्त्रता व स्वाधिनताया आन्दोलन सफल यागु खाँ ब्याकसेँ छम्हा छम्हा कार्यकर्ता वयक पिनिगु जीवनी ब्वड, थुइक हज्याय्मः धायोदिल ।

गवसाखलया नायो महेन्द्र बखुन्छ्या सभानायोलय् जूगु उगु ज्या इवःसं विजेश खाइतुं नं न्वचु तयो द्यूगु खः ।

क.स्तालिन व माओ जयन्ति

विश्व सर्वहारा वर्गया महान गुरुपुं स्तालिनया १४२ कगु व माओया १२७ कगु बुदिया लसताय नेपाल कर्मचारी समाज



इयस्तंगूगु स्वप पौ. बःछि पौ(पाक्षिक)

केन्द्रीय समितिया ग्वसालय् पुस २४ गते जूगु प्रशिक्षण व प्रवचन ज्याभ्वःसं नेपाल मजदुर किसान पार्टीया केन्द्रीय दुजः नपां ख्वप नगरपालिकाया प्रमुख सुनिल प्रजापति जुं मार्क्सवादया प्रमुख सार सर्वहारा वर्गया न्ह्यलुवाय बलपूर्वक सत्ता लाक कायो समाजवादी व्यवस्था निस्वानय्गु खः धायो दिल ।

मार्क्सवादं मानव समाजया विकासय् न्हँगु बिचः बियो न्हँगु लाँपु क्यड ब्यूगु खाँ ब्याकसें क्रान्तिया अर्थ आमूल परिवर्तन खः । संसारया छगू देशय् क्रान्ति सफल जुई । औद्योगिक रुपं लिनय् लागू देशय् नं क्रान्ति सफल जुई धाय्गु न्हँगु शिक्षा महान अक्टोवर क्रान्ति ब्यूगु खाँ ब्याकसें क्रान्ति सफल जुय धुनयवं क्रान्तिता क्वथयता जुइपुं क्रान्ति विरोधी त व गुप्तचरत खानय् दःगुलिं पार्टीता शुद्धिकरण याडः स्तालिनं क्रान्ति विरोधी संशोधन वादी तय्ता छखेलिइकः चिइक छ्वःगु खः । अपलं जनताता भिं जुइगु काथं न्ह्याकगु उगु पलाता संसारया कम्युनिस्ट तय्सं लसकुस याता । नेकगु विश्वयुद्धय् जर्मनी, इटाली, जापान नपांया

चिनियाँ कम्युनिस्ट पार्टी निस्वांगु सच्छिदा क्यंबलय् चीनं विश्वय् आश्चर्य जुइगु काथं विकास याडः क्यना । सन् १९४९ य् चीनय् न्हँगु जनवादी क्रान्ति सफल जुला । क्रान्ति सफल जूगु सच्छिदा लिपा अथे धाय्गु सन् २०४९ य् चीनया संसारया दकलय् विकसित दे दय्केगु चिनिया तय्गु म्हागस पू वानिगुलि विश्वस्त जुयागु खाँ ब्याकसे प्रमुख प्रजापति जुं चीनया थ्व अद्भूत विकासय् अध्यक्ष माओया त्हांगु योगदान दः धायोदिल ।

वयकलं न्हँगु पुस्ताकय् राजनीति प्रति वितृष्णा वगुया मू हु नि तःतः हांगु धःगु पार्टीया नेता तय्सं अराजनैतिक शैलीं खः धायो दिसे राजनीतिता ब्यक्तिगत स्वार्थखय् जक कयकुंकः तःसा राजनीतिया बदनम जुयो च्वगु धायो दिसे राजनीति नीति मध्येया जुजु खः प्रमुख खः धायो दिल । राजनीतिया लिधंसाय् जनताता असल व्यवहार स्यडः, सुसंस्कृत दय्केगुलि ध्यान तय्मः धायोदिल । अथेहे राजनीति याइम्हा मनूसिनं बेइमान याय् धुनय् वं राजनीति हे खराब धाय्गु भ्रम जनताकय् वानिगु धारणा ततं वयकलं समाजय् ह्युपा ह्युगु मतिं ज्या साडः च्वंपुं मनूतय्सं दकलय् न्हःपां थःतानिं परिवर्तन याडः देश व जनताया सेवाखय् इमान्दारीपूर्वक हज्यायमः धायो दिल ।

बम व बन्दुकं स्वयो ग्यापुगु आक्रमण विदेशी पुँजी याइगु खाँ ब्याकसें पुँजी पाखं देश कब्जा याइगु हे नव उदारवाद खः धायो दिसे देया स्थिति अः असहज जुयो च्वंगु दः अजगु इलय कर्मचारीपासापुं तस्कं सक्रिय जुयो ज्या सानय् मः धायो दिल । नपां ख्वप नगरपालिकाय् जनताया धेबां हे जनताया सेवायाडः च्वंगु व भीगु छप्पा छधि जुयो ग्वाहाली याइगु ज्याखं हे जिमिता अभ्र नं हौसला जुइगु खाँ वयकलं



साम्राज्यवादी देशं सोभियत समाजवादय् आक्रमण याता । समाजवाद म्वाकः तय्ता सोभियत संघया नेगूकरोड जनतां बलिदान बिला । स्तालिनया कुशल नेतृत्वया कारणं हे अक्टोवर समाजवादी क्रान्ति सफल जूगुखाँ प्रमुख प्रजापतिजुं काडः दिल ।

शत्रुं विरोध याइगु स्वाभाविक खः धायोदिसे वयकलं स्तालिनता साम्राज्यवादीतय्सं कुखिड जुइगु छुं आश्चर्य मखु राज्यत्ता क्रुर व तानाशाही जुइगु खाँ ब्याकसे राज्य सत्तां सुयाय्गु भिंयाइ व महत्वपूर्ण खाँ खः धायोदिल ।

समाजवाद व पुँजीवादय् छु पा धाय्गु विषय जनतातय्ता थुइक कानय्मःगु खाँ ब्याकसें वयकलं पुँजीवादी व्यवस्थाय् व्यक्तित्ता काथं छिनिगु काथं समाजवाद व्यवस्थाय् राज्यता भिं जुइगु खाँ हछ्याडः नीति नियम दय्किगु खाँ नं काडः दिल ।

काडः दिल ।

नेमकिपा नगर समितिया नायो नारायण बहादुर दुवाल जुं पुँजीवाद म्याद फुगु वासथें जूगु खाँ ब्याकसें 'चिनिया म्हागस' 'छगू क्षेत्र छपु लाँ' (एक क्षेत्र एक मार्ग) या खाँ ब्याकसे चीन थःगु देया लागिं जक मख संसारता थाकाय्गु मतिं हज्याडः च्वंगु खाँ ब्याक दिल ।

ग्वसाखलया नायो नपां ज्याभ्वःया भानायो गौतम प्रसाद लासिव जुं स्तालिन व माओया बुँदिं हाडः वयक पिनि पाखं सयकः सिइकः थुइकः दे व जनताया सेवा खय् पलाछियमः धायो दिल ।

ज्याभ्वःसं काजीबहादुर पञ्च, दिलकृष्ण माक, व काशिलाल प्रजापति जुं नं न्वचु तयो द्युगु खः ।

भक्तपुर घरेलु व साना उद्योग संघया अधिवेशन

पुस २७

ख्वप नगरपालिकाया प्रमुख सुनिल प्रजापतिया मू पाहाँलय भक्तपुर घरेलु व साना उद्योग संघया हिंडाकगू व महिला उद्यमि समितिया हिंप्यकगू अधिवेशनया उलेज्या यासे नगर प्रमुख प्रजापति जुं नेपःया आर्थिक विकासय् घरेलु व साना उद्योगया महत्व दैगु खाँ धवाथुइकसे भीगु देशता थःगुहे तुतिखय् दानय् फ्यक्केता फुक्कसिनं ग्वाहाली याय्म धायोदिल । नेपः देशं दांपुं ज्यामिकाथं विदेशय् छ्वयो च्वंगु खाँ खय् ध्यानाकृष्ट यासे प्रमुख प्रजापति जुं ख्वप नगरपालिकां नगरबासीपिन्ता थी थी लाहातय् ज्यादैगु सीपमूलक तालिमत बियो थःगु तुतिखय् दानय् फैगु जीवनोपयोगी सीपया तालिम बियो वयो च्वंगु खाँ ब्याक दिल ।



वयकलं भीगु देशय् विदेशी लगानी दुकालकिं देया उद्योगत तिडः छ्वया मालिगु खतरा खानय् दःगु खाँ ब्याकसें विदेशी धेवाखय् मिखा मतःसिं नेपःमिपिन्ता नेपालय् हे ज्या बियमः धायोदिल ।

वयकलं ख्वपया सम्पदा म्वाकः ल्यंकःतयता, विकास निर्माणया ज्या नपां फुक्क ज्या भूवःखय् नगरबासीपिनिगु साथ व ग्वाहाली दयो च्वंगु खाँ ब्याकसें ख्वपया थःगुहे पहःया मौलिक वस्तुत उत्पादन याडः, छ्यलःव प्रचार-प्रसारे विशेष ध्यान तयो हज्याडःच्वंगु खाँ काड दिल ।

प्रमुख प्रजापति जुं ख्वप नगरपालिकापाखं न्ह्याक च्वंगु कलेजं देया नितिं मःपुं जनशक्ति ब्वलांकःच्वंगु खाँ कासे ख्वप

नगरपालिकाता स्वस्थ, ब्वस्हेय लागु देया नमूना नगर दय्केगु काथं ज्या न्ह्याक च्वडागु खाँ ब्याक दिल ।

ज्या भूवःसं ख्वप जिल्लाया प्रमुख जिल्ला अधिकारी प्रेम प्रसाद भट्टराईजुं भक्तपुर घरेलु व साना उद्योगं ख्वपया आर्थिक रुपान्तरण याय्ता ग्वाहाली याडः च्वंगु नपां देया अर्थतन्त्र च्वन्ट्याकेगुलि संघया तःहांगु लाहा दै धायोदिल ।

ज्याभूवःया नायो विरेन्द्र जति जुं छुं नं देया विकास लघु, घरेलु व साना उद्योग या विकास मजुतलय् जुइमखु धायो दिसे नेपाल सरकारं न्हूगु प्रविधिया नितिं सचेतता व पुँजीया लागिं बैकपाखं घरेलु उद्योमिपिन्ता अःपुक ऋण वियमः धायो दिल ।

नेपाल घरेलु व साना उद्योग महासंघया वरिष्ठ न्वकु उमेश प्रसाद सिंहजुं घरेलु व साना उद्योगं देशय् आर्थिक ह्यूपा ह्यूता ग्वाहाली याइगु खाँ ब्याकसें महासंघं देशां देखिया घरेलु व साना उद्योगीया छाता संगठन काथं थःगु हक व हितया संरक्षण याडः वयो च्वंगु खाँ काड दिल । ज्याभूवःसं सभाया नकिं नपां महिला उद्योगी समितिया सभापति ईश्वरी श्रेष्ठजुं मिसात पाखं न्ह्याक च्वंगु उद्योग तय्गु हकहितयाता बिचः याडः समितिं थी थी ज्याभूवः न्ह्याक च्वंगु खाँ याड दिल ।

ज्या भूवःसं संघया पूर्व नायो नपां महासंघया केन्द्रीय न्वकु चन्दन कृष्ण श्रेष्ठ, ग्रील व स्टिल व्यवसायी महासंघ नेपालया

केन्द्रीय नायो मोहन प्रसाद कटुवाल, नेपाल घरेलु तथा साना उद्योग महासंघ बागमती प्रदेशया नायो सूर्य कँडेल, नेपाल घरेलु तथा साना उद्योग महासंघ पाखं केन्द्रीय प्रतिनिधिपुं नेम्हा डम्बर प्रसाद रेग्मी व सत्यनारायण प्रजापति, नेपाल घरेलु तथा साना उद्योग महासंघ महिला उद्यमि समितिया रीता अवाल, भक्तपुर उद्योग वाणिज्य संघया नायो प्रदीप श्रेष्ठ, भक्तपुर चेम्बर अफ कमर्सया नायो न्हुच्छे रत्न मानन्धर, भक्तपुर पर्यटन विकास समितिया नायो राम सुन्दर भेले पिसं भिन्तुना न्वचु बियो द्यूगु खः ।

ज्या भूवःसं संघया नायो बीरेन्द्र जति जुं मू पाहां प्रजापति व पाहाँपिन्ता मतिनाया चिं लःल्हाड ब्यूगु खः ।

नगर प्रमुख सुनिल प्रजापति पद्म मा.वि. या निरीक्षणय्
(२०७७ पुस १९ गते)



नगर प्रमुख सुनिल प्रजापति जु पाखं ब्वनय्कुथि निरीक्षण
(२०७७ पुस २० गते)



सैनिक आ. म. वि. या पीस्वकगू वार्षिकोत्सव्य नगर प्रमुख ज्यू
(२०७७ पुस १४ गते)



माघ १ गते निसें भौतिक उपस्थितिख्य ब्वनयकुथि चाय्केगु विषय बैठक
(२०७७ पुस २१ गते)

